



特 別
^18
4892
16



~18
4892
16

明詩綜卷四十三



小長蘆

朱彝尊

錄



海陽

金成棟

緝評

嚴

訥一首

訥字敏卿嘗熟人嘉靖辛丑進士改庶吉士授
編修歷侍讀學士禮部侍郎進尚書改吏部加
太子太保兼武英殿大學士卒贈少保謚文靖
有集

對月

良宵不可得清賞詎相違影落山精鏡光寒織女機林
鳥驚漠漠花露靜輝輝萬里邊城客防秋正未歸

明詩綜卷四十三

陸樹聲 一首

樹聲字與吉松江華亭人嘉靖辛丑會試第一
改庶吉士授編修累官禮部尚書卒贈太子太
保謚文定有集

靜志居詩話平泉在史館相高壽日同館皆更緋衣入賀公獨青袍立
嵩日巖之不為意也其後定陵踐位即家拜禮部尚書江陵將援之入
閣授以意佯為不覺竟托疾歸江陵大愠比歸遂不復
出天下高之卒時年九十有八與魏文靖同洵人瑞也

白鷺洲

白鷺洲邊建業城幾經攀折柳條生行人莫漫輕離別
聽唱陽關第四聲

董份 一首

份字用均烏程人嘉靖辛丑進士累官禮部尚

書兼翰林院學士有泌園集

送王侍御南還

山木自有枝結交亦有因豈無他人故莫若心所親願
得展婉孌攜手同清塵變故出須臾離別在茲晨如彼
同枝葉一旦東西分子董我食茶各自中苦辛含情各
倉卒匪我言所申

王崇古 二首

崇古字學甫蒲州人嘉靖辛丑進士除刑部主
事累官右僉都御史巡撫寧夏以兵部右侍郎
兼僉都御史總督三邊以右都御史總督宣大
加太子少保進兵部尚書召入協理戎政加少

保卒贈太保謚襄毅有山堂彙橐

李舒章云司馬意氣間整

詩話襄毅詩格聳高橫槩自喜然按之不無懦響

別同鄉諸同年

十載看花侶年來半去留江城憐我別霄漢羨君遊柳暗旗亭道花明禁苑樓征途從此始瞻望不勝愁

登鐘山戍樓

危樓高結跨飛虹古塔峻增對梵宮北去關河連塞上西來風物自秦中洞門暗向前山轉石井深連幽澗通扼險應期追一范不堪搖落戍煙空

方逢時一首

逢時字兆行嘉魚人嘉靖辛丑進士累官少保

兼太子太保兵部尚書有大隱樓集

李時遠云金湖古體擬曹陸近

體上下當侍隨州以得之倚輿橫槩間尤稱絕俗穆敬甫云方公詩氣勢雄豪律法嚴整如嫖姚出塞萬馬橫嘶而部伍不亂

過天津

城頭初日亂啼鴉客子行歌上使槎蜃氣高連蓬島近鴈行遙度薊門斜河聲過雨添新漲艸色和煙翳淺沙聞道邊庭猶苦戰九關西望動悲笳

呂時中一首

時中字道夫清豐人嘉靖辛丑進士改庶吉士

累官戶部右侍郎有潭西存橐

穆敬甫云呂公七律在開元大曆間

靈巖寺喜晴和吳學憲

秋山雨過靜朝氛爽氣初開散鹿群倚杖欲攀峰頂樹

披衣猶拂洞中雲青天塔影當巖落曉閣鍾聲別浦聞
自是新晴堪遠眺擬窮丘壑到斜曛

萬士和 一首

士和字思節宜興人嘉靖辛丑進士歷官禮部

左侍郎卒謚文恭有萬文恭公摘橐 姜廷善云履菴詩未嘗不工然

非酷意求工者

詩話履菴出荆川之門詩派從其師指授然荆川集中罕存酬和之作故履菴有姓名不挂更何論之句及督學貴陽以後詩另入一格荆川乃許之曰讓汝出頭蓋荆川初入館局詩學初唐晚年效邵堯大謂其天機自動未免頽然自放矣履菴雖宗擊壤而習染未深觀其黔南諸作頗有似柳柳州者

自炎方驛暮宿亦資孔

遠道資人力扶持萬嶺中仗隨徒隸亂輿放僕夫空雲

動嵐移黑霞收樹斂紅祇貪趨館宿未暇泣途窮

烏撒道中

地當高處峰隨轉雲到窮時路更賒夏半火刀方佈種
晚來牛馬不歸家瘴煙寒鎖蠻村樹嵐霧晴迷客子槎
干羽未能馴鬼國祇貪關市中鹽茶

洪朝選 一首

朝選字舜臣同安人嘉靖辛丑進士歷官刑部

右侍郎有芳洲集

詩話舜臣強直自遂為勞堪羅織斃之獄中士林多為扼腕時王道思唐應德輩銳意古文辭舜臣雖不與八才子之列而實聯鑣並驅道思與李中溪書云吾鄉洪芳洲先生文直得韓歐曾王家法吾輩駁雜視之有媿其傾倒至矣詩非擅長

送黃明齋歸姑蘇

往歲禪林居逢君同棲止予抱子輿疾君洗巢父耳同
 賦招隱吟宵効彈冠喜嗟予學不就冠帶束疲繭黽勉
 江東行意君雲霧裏胡為塵土間逢子亦在市髭髮半
 霜根垢衣露敝泉良久問口談始憶君名氏君有博古
 才五車在牙齒上精蒼頡書下綜姬公禮義畫卦之初
 機經兵所起星書甘石文地志神禹紀探詣各窮源名
 狀何切理遂令侯貴間傳客播芳美頗似驚座陳還如
 使氣禰忽驚風露零頓使家園邇去來本無心別離亦
 始
 條爾夫椒山窈深五湖水清泚請君具扁舟高臥從此

何遷二首

遷字懋益德安所人嘉靖辛丑進士累官刑部

侍郎有吉陽山房橐

李時遠云先生素講理學詩亦冲淡典實

送人守綏德

戎馬猶嚴警旌旃復遠行龍沙知上將燕領本書生樹
 引秦川直山連晉水清因君思保障萬里見長城

萬松菴

青林千尺陰覆此山中閣月出不逢人門前松子落

范惟一二首

惟一字于中松江華亭人嘉靖辛丑進士歷官

南京太僕寺卿有范太僕集

莫子良云太僕詩質而不浮麗而有則

送人之廣東郡幕

春杪都門道清尊送客行一官趨郡幕萬里是王程瘴
嶺排雲入蠻煙入市生回看鄉國樹黯黯正含情

龍華廢寺

鴈塢猶初地龍華半劫灰棟虛雲氣隱簷漏日光來馴
鴿羣迎客香花亂點苔還憐杯渡者何日問津回

雷賀一首

賀字時雍豐城人嘉靖辛丑進士歷官右副都
御史巡撫四川有雷中丞律選

宿郢東驛

策馬驅殘日開軒候晚風烏迴雲夢北花發石城東宦
況重來減風光別後同幾番經夙夜身世歎飄蓬

謝東山一首

東山字少安射洪人嘉靖辛丑進士歷官右副
都御史巡撫山東有近譬軒詩抄黔中小橐

次雲屏九日韻

海門孤嶼湧中流千古龍祠在上頭記得雙旌蒼水使
春風一舸下渝州

林懋和一首

懋和字維介閩縣人嘉靖辛丑進士歷官廣東
左布政使有櫟寄集

憩玄福宮

碧殿依青嶂丹臺入紫霞聊因駐征蓋復此訪仙家洞

隱疑無路林凋尚有花山童陳石髓羽客進胡麻石上
柯初爛壺中景未斜赤松如可見從爾學丹砂

萬衣一首

衣字章父潯陽人嘉靖辛丑進士歷官河南左
布政使有草禺子集

九日蒲圻張魏二省丈見邀

年年客裏逢佳節今日登高復異鄉二妙恰逢天上侶
孤臺宛在水中央白衣似為幽人至黃菊能如故國香
別後出關秋正杪年華旅思共淒涼

王應鍾一首

應鍾字懋復候官人嘉靖辛丑進士歷官山東

參政有缶音集

題謝中皋卷

林栖懷獨往人境迥遺羣一徑通樵路千山藹暮雲
禽當戶轉澗水向田分偃息亭皋上玄言不可聞

龔秉德三首

秉德字性之濮州人嘉靖辛丑進士歷官湖廣

按察副使有三幻集

朱中立云虹川詩和
粹婉麗藻思駿發

夏日齋居即事

首夏物始和端居恣游行林木花已敷池荷葉未展布
穀啼空桑流鶯下崇峴雨餘竹韻清日上巖光顯澄心
扇自捐縱目簾初卷偶因謝簿書兼得理墳典叨籍力

不任冒榮分非淺感茲華髮生滄洲若在眼神與元化
并思將遺慮遣守道情自愜處順顏無覲升沉嗟倚伏
明晦歎尋轉性本戀煙蘿敢云輕軒冕

曉發龍潭道中

霓旌蕩煙靄星駕轉岩堯水落龍潭淺山連雉堞遙林
昏猶辨月江冷不聞潮漸覺鍾陵近淒涼憶六朝

雨花臺眺望

崇臺縹緲出雲孤春日憑虛覽壯圖江繞潯陽遙辨楚
山連京口半吞吳秦淮風土憐今昔王謝豪華問有無
回首長干傷往事六朝煙雨半蘼蕪

鄭渭一首

渭字應清閩縣人嘉靖辛丑進士榜姓孫官至
河南按察副使有望川存橐

舟次桐江釣臺

乘舟入桐廬山水得佳憩伏岸倚灘隈連峰上雲際傍
石試躋攀臨流喜容曳目隨魚鳥閒心與漁樵契寂寞
古釣臺青蒼遠虧蔽天晴靈境幽日暮長川逝邈矣羊
裘人高名誰與繼

朱瑞登一首

瑞登字禾仲海寧人嘉靖辛丑進士由桐城知
縣選湖廣道御史歷按察副使有真逸先生集

中秋對月

林塘客萃止待月欣舉觴今夕勝昨夕已見生東方澄
空歛煙霧彌覺清輝揚初猶樹枝杪俄頃天中央徘徊
臨廣除白露霑我裳弦望洵有度明晦何能常良時不
屢值對此宜樂康毋容外物累長近君子光

李時行 三首

時行字少偕番禺人嘉靖辛丑進士除嘉興知
縣徵授南京兵部主事有青霞集

詩話少偕罷官歸里與梁公寔黎維敬歐楨伯吳蘭皋結社
稱南園後五先生其詩體格雖卑然亦清穩無叫囂之習

別吳山人擴

客中仍送客離思渺難任岐路一尊酒故人千里心歸
雲衝落雁寒角亂秋砧湖海風塵裏前期何處尋

酬張符臺秋夜閣直見寄

禁苑含香入高秋複道平疎星移鳳闕明月上龍城夜
半聞天語風前遲漏聲思君在霄漢清夢隔蓬瀛

寄廣陵高子通徐伯可

憶昔逢君客帝京留連郎署十年情看花並醉長千里
走馬同過白下城春入吳宮芳艸色月明蕭寺暮鍾聲
別來迢遞天南北一望江湖感慨生

張習 一首

習字子翀寶應人嘉靖辛丑進士官郎中

塞上

密雲今重地遙望幾重山西入黃花鎮東連黑谷關邊

臣常帶甲首女不垂鬟慚負司農識蒸民食尚難

瞿景淳

一首

景淳字師道嘗熟人嘉靖甲辰賜進士第二授翰林編修歷左諭德侍讀學士以太嘗寺卿領南國子祭酒事陞南吏部右侍郎卒贈禮部尚書謚文懿有文懿公集

秋懷

秋夜不能寐起視臨軒墀明月入我懷幽恨不自持憶昨赴京洛正當月弦時月明幾圓缺我行無還期祇應清光同千里長相思

吳桂芳

一首

桂芳字子實新建人嘉靖甲辰進士累官工部尚書兼副都御史總理河道有師暇哀言

東湖

東湖行一曲十里柳煙齊遠嶼浮空碧長雲壓水低岸香聞杜若沙淨浴鳧鷺更愛維舟處夕陰蓮葉西

劉崧

一首

崧字山父無為州人嘉靖甲辰進士累官大理寺少卿

天津即事

秋盡蒹葭白露晞片帆遙指朔鴻飛天橫絕塞孤雲遠水遶寒城落照微四海徵求方訴急九邊征戍未言歸

天津橋上空回首封事誰當達禁闈

趙鈇 三首

鈇字子舉桐城人嘉靖甲辰進士歷吏科都給事中陞南京太僕少卿有無聞堂橐

從軍行

從軍有苦樂從軍良不惡官家選民兵我軍只守城民兵負戈戰我軍立觀變民兵骨如山將軍不汗顏但得我軍在城墮不稱敗我軍生死將軍命將軍護軍如護印將軍有時罪猶錄行賞我軍恐不速莫歎身無衣居無屋但報寇入邊我軍有馬兼有粟如此從軍心亦足

白龍潭

白龍水底眠猶放雲光入有時化作人獨向峰頭立

古藤洞

古藤生洞口不遣遊人入酌酒坐藤陰飛泉忽相及

胡安 三首

安字仁夫餘姚人嘉靖甲辰進士歷官苑馬寺

卿有趨庭集 黃太冲云樂山詩極多雋句

無題

春到春歸不旋軫綠陰稠處花開盡泥中何得粘飛絮
墻頭忽見過新筍荒園落莫待我來小車久閣無人引
獨倚南樓待月明平生嬾作河陽尹

閨意

涼風動袖湖波起岸頭月影如秋水蓮房摘盡蓮葉低
含啼轉向芳閨裏征鴈還從北地飛山川何處不沾依
應知薄倖思羅綺不著年年寄到衣

固原

柳色凋殘雨未收陽關西去更堪愁平川落照連秦苑
古道吹煙覆驛樓刁斗風清初禁夜氊帷月冷盡防秋
雲山最是淒涼地今夜邊關第一州

汪一中

一中字正叔歙縣人嘉靖甲辰進士繇工部郎
中出為江西按察副使閩廣寇至戰死贈光祿
寺卿謚忠愍有南華山房集

汪禹又云正叔近體典
雅雄渾有盛唐人矩度

送吳舍人還楚

百年心事獨依依千里思家願不違燕塞夕陽孤雁渡
荆門秋雨一帆歸曲終江上人何處雲散荒臺夢已非
莫向鍾山賦搖落朝廷獻納似君稀

任環

環字應乾長治人嘉靖甲辰進士歷官山東右
叅政贈光祿寺卿

詩話倭人入犯任公大小數十戰功最多歸熙甫詩云江南列郡盡乘
城藏穴何人肯出兵惟有使君躬擐甲劉家港口看潮生公軀瘦瘠倭
人目曰瘦官人望而避之
詩特其寄興然亦明淨

和張石川野航之作

蘆花汀畔獨移船一曲滄浪興杳然已付世情流水外

遂令心事老江邊
閒憑魚浪傳書帖
淨愛鷗沙占酒筵
便與先生訂幽約
乘槎直欲犯青天

江珍一首

珍字民璞歙縣人嘉靖甲辰進士除高安知縣
徵授禮部主事遷南京兵部郎中出知廣信府
轉按察副使歷浙江叅政按察使雲南右布政
使終貴州左布政使有華委堂集

籍唐人而有得者

寄汪伯玉職方

聞汝燕山信秋深已飭裝如何冰雪候猶未到江鄉舟楫關河阻兵戈道路長倚闌思不極雲樹渺蒼蒼

徐文通一首

文通字汝思永康人嘉靖甲辰進士歷官山東

按察副使

王元美云徐汝思如初調鷹見擊鷲故難獲解

岱宗

岱頂凌霄十八盤
中原蕭瑟思漫漫
振衣日觀三秋曙
倚劔天門六月寒
風雨黃河通瀚海
星辰紫極近長安
小臣願獻蓬萊頌
閭闔高懸謁帝難

魏文煥一首

文煥字德章侯官人嘉靖甲辰進士歷官四川

叅政備兵松潘有石室私抄

遊武卮

躡步上昇真長揖紫霞客茲山多靈異想像銀臺闕
草吐金光慧泉注丹液仙翁挾茅龍棄世如遺跡回首
謝所親尚留赤玉鳥我欲往從之茫茫水雲白誤與軒
冕期學道恐無益

張才二首

才字茂參西安衛人嘉靖甲辰進士歷官按察

僉事王元美云張茂參如荒倉渡江揖讓簡略故是中原門第

詩話元美評茂參詩比之荒倉渡江茂參之言曰自六義輟講而詩教寢衰五傳異觀而文體漸裂今昔殆不相及矣務艱者氣鬱而不信樂易者神渙而弗耀侈博者意累而靡潔至或思不通圓而極貌摹倣識未周洽而委心剝效支戾勿經躊駁可厭篇帙雖富豈足稱哉其意亦似不滿於瑯琊歷下二子度其集必有可觀而惜其罕傳里有姚史漸曾問牧齋宗伯茂參何名牧齋不能答則其論詩之旨聞之者益鮮矣

朝陵歌二首

本朝陵墓傍燕關殿閣參差霄漢間王氣千年朝北極
雄圖萬里抱西山

松門回首七陵遙春殿金燈鎖寂寥地迴忽看星斗動
夜深疑有鬼神朝

劉鳳一首

鳳字子威長洲人嘉靖甲辰進士官至河南按

察僉事有澹思太霞二集李于田云子威掘奇索隱抗心無前屠長卿云侍御思苦志

勞力動神王沉淵無底排雲直上錢受之云子威博覽群籍苦心鉤索著錄賦古文數十萬言觀者驚其繁富憚其奧僻相與駭掉惛眩望洋而歎以為古之振奇人也嘗試為之解駁疏通一再尋繹肌理解已而索然不見其所有矣余嘗得子威所誦讀遺書觀其丹鉛考索大繫於篇中擷句於句中擷字而所擷之字自一字至數字而止如唐人所謂碎金齋者耳其有所撰述也累辭字而成句字稍夷更刺僻字以蓋之累奧句而成篇句稍順更撫奧句以竄之而字之有訓故句之有點讀篇之有段落固茫如也餽創堆積晦昧詰屈求如近代之江

爰李滄溟且不可得而况於古人乎韓子曰降而不能乃剽賊子
威其剽賊之最下者與 陳臥子云子威意在獨造頗傷冗仄
詩話子威局守于鱗唐無古詩一語歎為知言其詩鑿積纂組節俱
斷俾讀者茫然如墮雲霧中吳趨土風清嘉不意出此鈍漢所著澹思
太霞二集類一時顯名者序之盛相揚詡而吳市賣卜人袁孟逸每向
人挾搯其字句鉤棘文義糾繆者以為姍笑子威聞而大怒愬之有司
有司既撻之而數之曰若敢復姍笑劉侍御詩文耶伏地對曰民寧更
受笞數十不能妄諛劉侍御也蓋州楚之公論尚存勝於士大夫曲徇
多矣

懷友

迴思京洛日初及壯盛時極意但娛樂奄忽歲月馳亦
知計不立才薄靡所施良無根株託飛蓬安可期自我
與君居遠在天一涯出處道不同榮悴古有之反復念
疇昔筋力亦已衰會面諒無由願寄一言辭久要貴能
敦情義兩不疑勗哉崇明德式用慰我私

朱曰藩

五首

曰藩字子价寶應人嘉靖甲辰進士除烏程知

縣遷南京刑部主事改兵部轉禮部郎中出知

九江府有山帶閣集

王元美云朱子倫如高坐道人袂衣躡屐忽發胡語

詩話升之詩倣北地子价則法用修其在金陵懸用修画像於寓齋焚
以東官香薦以陽羨茶賦人曰草堂之詩與唐李才江尊賈浪仙為佛
事絕相類然其詩實與用修派遠由其牽絲西吳蓋心慕蔡白石故爾

贈袁河內

漢郡繇來重仍傳借寇行山從上黨斷河入大伾平訪
古停千騎班春徧百城西征雲物美憑軾賦先成

贈石城文選拜南太常

我祖都江左鍾山萬古憑朱旗唐鹵簿白露漢園陵懷

明詩紀卷四
里心長往分曹事有恒清齋三五日贈子玉壺冰

飲罷

沙溪雨過漸通潮新漲朝來拍小橋九曲湖塘藏窈窕
數株門柳伴逍遙時魚饌客烹蘆筍海鶴驚人起稻苗
飲罷中庭不成寐夜間河漢正寥寥

將入雲中作

咫尺分胡地崎嶇出漢關今宵看太白一上紇干山

舟行

淥水平如鏡芙蓉媚遠天時聞采菱曲唱近使君船

陳皋謨一首

皋謨字思贊江陰人嘉靖甲辰進士除知蒲州

歷南京工部郎中有薄游北游南都諸橐

環縣城遠眺

靈武孤城霽色開感時還上最高臺山樓風急熊旗動
關塞天連鳥道回經略久寒西夏膽安危深仗北門才
殊方獨抱懷鄉思日暮愁聞画角哀

劉爾牧一首

爾牧字長民一字成卿東平人嘉靖甲辰進士

授戶部主事歷郎中忤嚴世蕃廷杖削籍有堯

麓集

王元美云成卿質
秀才俊尚未成家

重陽前一日

楚天愁絕九迴腸漢水煙波動渺茫雁盡北書無日到

秋深南菊為誰芳
江頭落葉催行路
峴首浮雲蔽故鄉
惆悵年來遲暮意
明朝風色是重陽

蔣孝一首

孝字維忠武進人嘉靖甲辰進士官戶部主事

顧玄言云戶部才情綺麗頗任俠氣

贈顧少參

白下今才子華陽舊隱居
早辭南省貴來著北山書
邑有盧敖井山藏內史廬
堂前曳珠履寧羨食無魚

方九敘二首

九敘字禹績錢唐人嘉靖甲辰進士有十洲集

同諸子游靈隱寺夜宿澗西房

厭喧慕幽棲惜陰耽夕憩
梵宇枕山阿層巒延遠睇
水石互清華松篁紛蔽翳
緣澗蔭芳椒依巖構禪砌
嵐翠罨簷牙靈籟響雲際
曖曖日將頽淒淒風且曠
稍覺朝歡闌還因宵賞滯
高閣謝塵囂流泉澄夢寐
况復偶羊何寧須狎支惠
尚子欣遠遊嵇康慵作吏
苟非賢達人詎知身似寄

鳳山懷古

宋朝宮闕鳳山隈
輦路荒涼過客哀
青史尚留南渡恨
黃旗無復北庭回
沙埋舊井琉璃碎
蘚蝕殘碑翡翠開
歎息百年行在所
只今惟有梵王臺

余文獻一首

文獻字伯初德化人嘉靖甲辰進士有九厓集

送聶子靜南還

十年纔返國何事復南歸歲月冰霜晚江湖鴻雁稀青山還舊業落日初衣去住乾坤裏無嗟與世違

李汝蘭 一首

汝蘭咸寧人嘉靖甲辰進士

溪上晚歸

徑路草萋萋歸人咫尺迷水聲聞犬吠月色見雞棲露下沾衣濕星垂掛樹低今宵有風雨多在杜陵西

彭謙 一首

謙字德光溧陽人嘉靖甲辰進士有茭東棗

早行

畏塗兼歲暮假寐怯宵征高柳霜前短殘星曉後明板橋人度影画角戍傳聲野燒前山起羈心黯自驚

張居正 四首

居正字叔大江陵人嘉靖丁未進士改庶吉士

陞編修歷春坊學士以禮部侍郎入內閣官至

太師吏部尚書中極殿大學士卒謚文忠有太

嶽集

詩話江陵以奪情為清議所不容然能自任天下之重定陵冲年請大
閱京營之士時掌中樞者山陰吳尚書兌也尚書繪圖藏之家子曩從
尚書孫錦衣使國輔處見之及戚武毅鎮薊大臣行邊簡閱士馬隨上
功狀疏恩晉秩烽火不徹於甘泉者一十五年江陵之秉國成可謂安
不忘危得制治保邦之要矣近靈壽傳尚書維麟撰明史記乃與分宜
合傳毋乃過與于文定與丘尚書書云江陵以蓋世之功自豪固不肯

甘為汙鄙而以傳世之業期其子又不使濫有交游其平生顯為名高而陰為厚實以法繩天下而間結以恩其深交密戚則有賂路人不敢也債帥鉅卿則有賂小吏不敢也當其柄政舉朝爭頌其功而不敢言其過及其既敗舉朝爭索其罪而不敢言其功皆非其情實矣此足以當爰書聞有題詩于故宅者云恩怨盡時方論定封疆危日見才難二語足稱詩史矣

恭勵聖學

元后輔萬邦綏猷良不易若稽古哲王多聞乃建事堯舜帝者宗精一闡微義夏禹既祗德殷高亦遜志成后務緝熙周詩咏小毖猗與休烈光英聲播來嗣今皇體睿明冲齡纂神器爰當訪落初即敞金華秘書帷簡儒彥藝圃覃文思朝晷不遑暇寒暑靡暫離寰宇仰休明風雲慶遭際顧以謏陋質無能補天地願言崇聖功問學登純懿勿云天聰明無為事博識圖書足自娛兼之

益神智勿云富春秋茂葉良可諉寸陰重逾璧居諸易流駛勿云履崇高優游保天位君心苟縱逸萬幾遂顛墜勿云當燕閒可以快志意一暴而十寒細行終為累戒彼鴻鵠心專精道乃致摯御必端良勿狎於匪類為山九仞崇成功虧一簣慎初惟克終終保無為治愚臣職司規敢以告中侍

莊敬太子挽歌

鶴馭凌霄漢龍樓鎖寂寥空悲仙路杳無復寢門朝綺季辭金輅浮丘侍玉霄惟餘鳳笙曲猶逐白雲飄

舟泊漢江望黃鶴樓

楓林霜葉淨江煙錦石游魚清可憐賈客帆檣雲裏見

仙人樓閣鏡中懸，九秋查影橫青漢。一笛梅花落遠天，無限滄洲漁父意。夜深高詠獨鳴舷。

潛江憫勞

水漲平堤沙岸迴，野田今見荻花開。江濤挾雨秋仍壯，塞雁衝寒暮獨來。歲晚風霜歎客枕，夜深燈火傍漁臺。悲時已有江南賦，愁聽荒城画角哀。

殷士儋

三首

士儋字正甫，歷城人。嘉靖丁未進士，累官少保兼太子太保、禮部尚書、武英殿大學士。卒，贈太保。謚文通。有《金輿山房集》。

王忠伯云：先生登高而賦，餞別而歌，體齊魯之雅馴，兼燕趙之悲壯，采吳越之婉麗，以

求勝于歷下，婁水之間。

送劉希宏驛宰之高郵

迢遞淮南驛，風煙隔楚波。潮平漁火近，日落客帆多。遠樹生鄉思，青山入棹歌。春來見芳艸，知爾憶鳴珂。

送趙萬舉守淮安

聞道淮陰郡，輿圖屬上游。雲連江國曙，地接海門秋。特簡中朝彥，遙分南顧憂。青山迎列戟，芳艸待扁舟。楚甸歌新牧，瑯琊識故侯。津橋通晚泊，膏壤課春疇。樹色依官舍，潮聲入驛樓。知君富登覽，吟興滿滄洲。

題番馬圖

玉塞無聲夜有霜，橐駝五萬入漁陽。平沙落日悲風起，馬上橫捎四白狼。

楊 魏 二十一首

魏字伯謙海豐人嘉靖丁未進士除武進知縣入為兵科給事中歷右都御史巡撫宣大陝西山西入為兵部侍郎陞南京戶部尚書召入改工部復改戶部再改吏部加太子少保進太保

贈太師有夢山集

朱中立云夢山詩不事雕繪旨趣天成王貽上云先生五言直舉胸臆真澹雅素

而格在其中陶韋嫡派儲王之雁行又云先生詩蕭疎簡遠得淵明摩詰之真品當在蘇門之次西原之上謝方山云先生擅場本在五言其近體妙處發源王孟接軌高薛嘉隆塵空之習曾采染其筆端故是間代清律沈山子云夢山五律固是長城其全首矜鍊者不待言句如風雨樓煩國關山李牧祠春風吹戶牖芳州遍庭除薄地不盈頃州房才數間漁樵原舊業荷芡有初衣花憶春城發門憐芳艸多北窗風到處深樹鳥鳴時爛雪春仍積岩花夏始開家貧人臥穩橋斷客來稀杯外分平楚窗中到遠山霜笳連夕院野燒到經臺野燒驚沙雁霜風落塞榆人垂燈下淚鬼哭雨中魂皆近自然豈四溟山人所能及

詩話夢山與中麓滄溪同郡而其詩遠法右丞左司近取蘇門不蹈章丘猶鄒之音不墮歷下叫囂之習信豪傑之士也集不甚傳近新城王尚書德州謝郎中重為鏤板始行於世夢山自言不知詩補晉景時學使者曹君紀山謂當以唐人為宗且辨其體格及歸田四明呂山人往來海上相與倡和共明此道云云呂山人者時臣中甫也紀山名汴江陵人嘉靖辛丑庶吉士仕至右副都御史巡撫雲南以夢山推許若是度其詩必有可觀惜無好事如王謝兩公刻之以傳也當嘉靖初北地信陽朝華已謝滄溟集盛唐人字句以為律一時宗之正猶隋苑剪綵成花淺碧深紅未嘗不該人目然生意絕少此時讀夢山詩如水仙十囊江梅一萼嫣然薄冰殘雪之外有不愛惜者邪

春日述懷

曉齋春雨歇一鳥當窗鳴山雲入我座不知在邊城夙心本閒曠偶無塵事縈手把楞伽讀忽已忘吾生軒冕是何物可以嬰其情君子貴得道誰能顧浮名

醒後聞磬聲

泠然響清磬我思良悠悠披衣一起坐明月懸高樓遙

明詩紀卷四十三
遙目天宇空闊萬象收此時無人言獨與太虛遊河清
不可俟天運倏已周冥心入無極真想在浮丘人生亦
晝夜身外更何求

漫翁詩

子美稱漫郎次山號漫叟兩公皆偉人斯名傳不朽余
本疎闊士且與病為偶性惟率其真名不居其右雖嘗
為文章不習韓與柳詩韻尚未諧况復辨好醜亦嘗涉
世故世故良難剖執事與掄材舛錯恒八九自信惟此
心得失兩無有所幸遂歸來惟與鹿豕友耕也不知獲
漁也不用筍富貴若浮雲詩書成敝帚於今年八十萬
事空回首茫茫視天地未知誰長久仍欲惜豹文仍欲
競雞口縱得千載名何如一杯酒歲月自盈虛吾生無
譽咎從此稱漫翁可並古人否

送黎樂溪轉甘肅太僕

白嶺千山外黃河萬國西塞雲秋渺渺沙艸日淒淒遠
地愁離別邊城尚鼓鼙昔賢名未泯勲業爾能齊

北樓口留別許叅戎

絕塞難為別離尊駐晚暉悲風嘶去馬落葉上征衣野
燒臨河斷寒沙帶雪飛邊城人不到此後信應稀

忬州雨夜

世慮已難遣况當旅館秋寒城夜半雨故國夢中樓河
漢幾時曙蛩螢增客愁鴈門明日路鼓角入邊州

柏林寺別王計部寺即李晉王葬所

園陵今作寺秋艸向沙陀事歎千年往人憐兩度過山
川明霽雪鐘磬帶煙蘿於此別知己尊前意更多

壬申九日登覽曠亭憶舊兼喜谷司馬初還次前

韻

往事真如昨登高復此間歲時人半老江海客初還暮
鴈聲偏疾寒花色自斑不須多感慨東望有牛山

秋日閒居

笑我起居處寥寥一竹床長貧諳性命多病識行藏地
與紅塵遠秋憐白日涼山僧久不至木落井西堂

送汪山人遊山海

自是江湖客猶然變姓名妻孥貧不問書畫老逾精雲
黯秦王島山高孤竹城同誰登碣石醉看海濤生

雨夜董信溪過訪

臥病滄江上柴扉晝不開况茲風雨夕乃有故人來遶
屋吟黃葉疎燈照綠苔平生丘壑意共盡掌中杯

秋雨宿黑石嶺

嶺險藤迷路山高石作城片雲何處雨孤客此時情茅
屋幾家住秋風半夜生旅魂愁已絕况聽鼓鼙聲

早秋登龍門城樓

指點雲州地真為漢北門八城臨大漠一路向中原晴
日山川映秋田禾黍繁文莊經略處父老至今言

經順聖川

野曠行人斷風高戍鼓鳴青山鄰絕漠白日閉孤城戎馬千年地江湖萬里情不堪征戰後極目一沾纓

環縣早行

羌狄平無日滄江未擬還燈前梳白髮馬上夢青山薄曙羣峰外殘星杳靄間雞鳴問何處已度古蕭關

蕭關北作

塞路山難斷天愁雲不開遙驚戍火起數見羽書來周室朔方郡唐家靈武臺客心正多感羌笛暮堪哀

宿瓦雲驛

蕭條來野館秋艸正淒淒復此聞風雨兼之厭鼓鼙經

年堦樹老入夜怪禽啼獨坐生歸思田園渤海西

沙磧驛逢劉參戎

風塵滿目塞門閒媿我書生鬢欲斑爲問干戈何日定不知江海幾人還河聲暮遶沙邊驛雪色晴看天外山全仗將軍能破敵莫令匹馬近三關

酬劉二府過嶺園

老喜高軒海上過開尊嶺圃對煙蘿纔聞朔塞兵初罷豈料中原事漸多話到蒼生流涕淚愁臨岐路邈山河眼前君最強吾意國士寧論甲乙科

春日南墅讌集

南郭春偏好留人到夕陽風吹山鳥語花落酒杯香

憶舊有感

丁卯橋西憶舊遊
綠楊高映酒家樓
故人莫訝凋零盡
一別江南四十秋

陸光祖 一首

光祖字與繩
平湖人
嘉靖丁未進士
累官吏部尚書
贈太子太保
謚莊簡

金陵懷古

宰木蕭蕭起暮風
君王不復渡江東
舞衣滿地生新艸
過客沿溪問舊宮
垓下一朝離不逝
咸陽二月火徒紅
英雄轉鬪無完策
四面悲歌入帳中

林 爓 六首

爓字貞恒
閩縣人
嘉靖丁未進士
累官南京禮部尚書
贈太子少保
謚文恪
有對山集

爾雅若璞玉渾金無詞人藻繪刻鏤之習

馬侍御宅偕同館諸丈宴集

人生百年內
奄忽浮雲馳
隨風日萬里
聚散難可期
昔我同門友
王事各乖離
豈伊道路遠
邈若天一涯
三秋積晨暮
耿耿懷相思
何悟升斯堂
復得一追隨
豐般列綺席
美酒溢金卮
相見各怡然
獻酬吐芳辭
蘭膏繼明晝
良夜殊未疲
鳥棲戀共林
魚遊樂同池
交誼古所敦
久要諒不移
今夕良宴會
貽爾伐木詩

舟發芋江別諸兄弟親友

宦遊二十載幸始歸故鄉盤桓未及久戒徒復嚴裝豈
不戀樂土王事有靡遑遲遲出郊郭回顧悽以傷秋風
何飄飄吹我征衣裳兄弟送我行執手淚數行親戚送
我行各攜壺與觴日暮客程促踟躕猶路旁泛舟沂大
江怨彼道里長落葉雖隨風遶樹自飄揚禽鳥失儔侶
嗷嗷鳴迴翔矧伊骨肉情離別天一方暫且赴簿領行
當返耕桑努力各自愛引領遙相望

工曹後園觀稼

伊昔仕京華不忘畎畝志幸此南土遷公署有餘地後
園墾爲田蕪穢舊已治陽春倉庾鳴四壁肇農事晨興
戒農夫播種及時至薄言勸其勤篋餉數器實閔東
作勞豈要西成利周行阡陌間嘉樹或時憩即日雖暫
欣於心慨未遂伐檀刺素餐鵜梁譏竊位自顧魯鈍姿
食浮久吾媿悠悠望故山懷古有深意寄謝沮溺群高
蹤庶可企

孝烈皇后挽歌

鳳穴金宮秘龍章寶冊宣曾將五色石能補九重天桂
殿花空落松門月自懸惟餘歌懿德長續二南篇

送二兄謫平樂貳守

暫會仍分手離魂黯欲銷如何適萬里况乃傍三苗中
土風煙隔征途雪霰飄願將盤錯意持報聖明朝

詠史

朱雲折檻日賈誼上書年感激廷空爭飄零席始前白
頭槐里令青簡汨羅篇直道元如此千秋世共憐

王樵五首

樵字明逸金壇人嘉靖丁未進士累官南京右
都御史贈太子少保謚恭簡有方麓集

詩話方麓研心著書自言六經畢其四詩特游藝然清婉軼倫
當顧甄太函白榆滄思叫翼之會乃聞此雅韻實獲我心也

短歌答趙江都金山見懷之作

海門兮長風中流兮孤嶼懷美人兮何方覽大江兮東
去

香山寺

曉色開層閣春天淨翠屏檻凭千樹綠門掩四山青遠

寺分林見流泉夾路聽禪房人不到花竹晝冥冥

除夕

塵事俄消日他鄉亦作年功名慙鏡裏兒女且燈前

望湖亭二首

平疇門外春雨遠寺山西夕陽柳暗溪橋輦路水肥種

桂江鄉

孤村數家隱樹一曲清流抱山四月城中未有林端黃

鳥關關

宋儀望三首

儀望字望之吉安永豐人嘉靖丁未進士歷官
僉都御史巡撫應天進大理寺卿有陽山豪華

陽館集

初去吳門作

營世無疾途筮仕獲下秩綰綬出明邦感懼情非一雖
抱濟物情良缺經世術簿書日紛紜督賦無寧日覩茲
民力艱焉忍事桎梏淳風古已頽文質相毀蝕慙無下
堂化何由示師帥直道旣已危降志還見嫉沉憂結衷
腸能不慚三黜徵書來日下濫此樗朽質新恩詎云辭
夙抱未及畢驅馬出郭門寒風正蕭瑟道傍凍餒人對
我長歎息殷勤謝父老聊以微哀述

自欒城趨柏鄉

朝發欒子邑暮投柏人鄉驅車多所經指顧情內傷燕
趙昔吞并四海如沸湯豪俊相馳騖一言決興亡故壘
何蕭條云是古戰場俯仰今昔間沉痛結衷腸累累道
傍冢誰辨愚與良燕昭旣不存平原客久荒不見黃金
臺樹木鬱蒼蒼息駕暮雲沉感歎彌難忘

遊梅仙山

白雲在深山山深轉空翠古木凌飛煙叢竹亦森邃梅
公隱何時漢道昔云季當其抗言時鼎鑊寧足畏一斤
眇何所去作南昌尉茲山信超曠盤鬱多佳氣幽棲亦
何爲豈不以我貴一朝變姓名挂冠從此去新舊相太
息妻子不知處余亦骯髒人誤觸當時諱見幾苦不早
撫已有深媿永願謝塵緣長往從我志

胡杰一首

杰字子文豐城人嘉靖丁未進士改庶吉士歷南京國子監祭酒陞太常寺卿有劔西臺

九日馬西田侍御讌具瞻樓

亭閣鬼鬼俯一丘柏臺清讌復高秋籬邊黃菊經時晚
谷口青鷗竟日留抱病有懷仍對酒自公多暇幾登樓
臨風不用傷搖落歸路月明山更幽

馬一龍二首

一龍字員圖溧陽人嘉靖丁未進士改庶吉士
歷官國子監司業有遊藝集

湖上有懷

湖上青山半入城湖中風景坐來清高飛雙鶴與天近
遠去孤舟隔水明為客故鄉秋雁杳懷人落日莫雲平
無端忽起思歸念相對尊前共一傾

新豐夜泊

新豐市上酒家邊夜泊沽來不用錢北風吹雨欲作雪
客子到家將近年京國書傳千里外剡溪路入小村前
深林舊有高人隱尋到梅花却繫船

章适一首

适字景南蘭溪人嘉靖丁未進士歷官禮科給事中

塞下曲

材官三十萬日夜出臨洮不見烽塵息惟聞甲第高盤
鵬依障落獵馬向秋豪辛苦從征地黃沙蔽白蒿

孫永思 二首

永思字性孝蒲州人嘉靖丁未進士除行人選
授浙江道御史

海珠寺讌同鄉李崔二鴻臚

象設鄰鮫室江流達海門上方無陸路四壁有潮痕香
霧籠珠樹飛花墮玉尊漁歌相聽處萍水不須論

登鎮海樓用韻

越王臺接五城樓島嶼連空起暮愁瘴海波濤浮日月
炎天風雨自春秋亂帆歸晚聲相軋萬樹邊江葉盡流

莫向危闌聽吹笛武陵離思在南州

詩話二詩侍御巡按廣東
時作蓋嘉靖丙辰年事

楊繼盛 二首

繼盛字仲芳容城人嘉靖丁未進士除南京吏
部主事入為兵部員外郎坐論馬市貶狄道典
史稍遷知諸城縣陞南京戶部主事轉戶部員
外調兵部疏劾嚴嵩論死贈太常少卿謚忠愍

有集

皇甫子循云楊忠愍辭尚宏麗語罕怨誹江河一瀉乃徵其才
光燄萬丈悉由於氣 蔣仲舒云楊公忼慨赴死讀其詩想見
其人沒世而
後猶有生氣

送徐子與讞獄江南

寥落白雲司半虛看君此去更何如西曹月滿幽人榻

南國星隨使者車，塞雁不堪行斷夕。秋風况是葉飛初，秣陵故舊如相問。為道疎狂病未除。

懷鶴峰東城因寄

屋梁落月應懷我，春艸池塘更夢誰。記得別時懸淚眼，佯為笑語怕相思。

彭輅二首

輅字子殷，嘉興人。嘉靖丁未進士，除江西布政司照磨，遷知新淦縣，左遷應天儒學教授，轉國

子監博士，陞南京刑部主事。有《比部集》。

焦弱侯云：先生詩意

高簡中融婉秀卓，然名家是時。七子出，互相矜詡，雖有名於時，而辭調往往如出一人。先生能為眾所不為，不少貶以就俗，宜其知者鮮矣。詩話先生早慧於詩文，不甚敦琢，其持論取法中唐，謂神在象外，象在言外，言在意外，然率矢口肆筆，而成頗類解大紳。下華伯一流，昔人所

以有才多之憾也

良鄉道中

昔去經衰柳，今歸見早梅。緇塵飛不盡，白日黯難開。短劍餘孤憤，長歌動七哀。年年薊門道，空老雒陽才。

送祝學博之當塗

姑熟城頭月，常邀米石雲。山齋看不厭，聊以贈夫君。

詹萊一首

萊字時殷，常山人。嘉靖丁未進士，有《招搖館集》。

漁火

絕浦漁燈暗，空江月色多。關山空有恨，欸乃忽聞歌。風靜星河沒，天寒木葉波。孤舟無住止，獨酌奈愁何。

沈淮 一首

淮字激伯仁和人嘉靖丁未進士有三洲集

積雨不能出有懷湖上

霞樓月榭欲生塵水上煙雲積幾旬滿地山花應笑我
雨中春色屬他人

甘茹 一首

茹字征父富順人嘉靖丁未進士歷官按察副使

送成邑博

江城秋色暮客子欲何之司馬浮湘日元王設醴時風
吹猿峽冷霜落鴈峰遲欲識相思調君聽苦竹詞

鄭東白 一首

東白字叔曉莆田人嘉靖丁未進士官至按察僉事

釣舟

空亭一葉下落日五湖秋白幘攜尊酒滄波坐釣舟鐘
聲山外寺樹色水邊樓吾愛鴟夷子浮家汗漫遊

周思兼 三首

思兼字叔夜松江華亭人嘉靖丁未進士除知平度州遷工部員外郎有周叔夜集

送李羅村大叅河南憲長

春風斗酒邵陵西新柳依依綠滿堤征馬不須催客去

明詩綜卷四十三
暮猿何事向人啼道經湘水花初發夢繞漳河路欲迷
故舊那堪頻送別愁看芳艸轉萋萋

題画

遠渚蒹葭滿孤村風雨多明朝江上路誰載酒船過

送林雙池

故鄉故人今別離春風春艸各天涯尊前相對唯今日
去後相逢知幾時

明詩綜卷四十三

明詩綜卷四十四

小長蘆 朱彝尊 錄

膠城 陸廷燦 緝評

徐學謨 一首

學謨初名學詩字子言更字叔明蘇州嘉定人
嘉靖庚戌進士授禮部主事歷郎中出知荊州
府遷副使擢僉都御史撫鄖陽召拜禮部尚書
加太子少保有海嶠春明二橐

靜志居詩話宗伯本名學詩以與劾分直者同姓名遂更為謨昔杜欽
損日人斥為盲艸惡其同字遂自稱疾猶見議於當時若宗伯更名乃
屬患失百世而下知有直臣陳孟公之名遵何必
驚坐諱哉宗伯雅負詩名然多儒響殆肖其人

白螺行

明詩綜卷四十四

風吹巫峽江水大何者一螺當江坐勢壓水口抵齧崩
沙脊嶙峋橫伏馱螺邊人家泛估船得魚買鹽撐日過
去年水淹車木堤滿縣漂衝失耕作官府有差無處派
翻視白螺為奇貨紛紛下帖迎上司白日索夫夜巡邏
可憐殘子苦無皮忽聞使者收門課門既有差地有租
此額更從何處科生血迸地不得收爺娘妻子忍遷播
輸錢猶可輸命難偏側乾坤幾穩臥魯門爰居知避災
眼前世事堪一唾老蛟跋浪白鱸泣賤夫只恐滄江破

王好問 二首

好問字裕卿樂亭人嘉靖庚戌進士歷官南京
戶部尚書贈太子少保有春照軒集

春江曲

東風度江城四山漾新綠江頭蕩舟人載酒過江曲少
婦白苧歌風吹斷還續春鳥似相依雙雙沙上浴

幽居

幽居少煩慮愛此屋上山嘉木蔭方池流水常潺湲東
風弄晴和好鳥鳴關關觸目若有得撫景心自閑甯哉
廣成子望望不可攀

劉效祖 四首

效祖字仲修濱州人嘉靖庚戌進士除衛輝推
官徵授戶部主事歷負外郎中出為陝西按察
副使有雲林橐

朱中立云仲修詩沉著渾雄
得盛唐氣格李伯承之亞也

詩話副使負經世略坐計吏罷官晚寄情詞曲所填小令可入元人之室如沉醉東風云東華路塵沙滾滾玉河橋車馬紛紛官高休羨榮命蹇須安分靠青山紫閣柴門間把英雄細討論能幾個到頭安穩又一闕云門巷外旋栽楊柳池塘中新浴沙鷗半灣水繞村幾朵雲生岫愛村居景致風流間啜盧仝茗一甌嚼翁意何須在酒朝天子云喜碧山日親把銀魚早焚銷繳了功名分輶車鳩杖鹿皮巾也不讓黃金印晚景無多前程休問趁明時自在隱尋幾個故人團坐在華門嘗則把陰晴論雜之小山樂府中不能辨也昭陵嘗遣中使索其題冊呼曰念菴念菴副使別字也因賦詩云更生雙鬢已蕭騷敢謂文章擅彩毫過誤偶承明主問因緣不是鬱輪袍都人傳其事以為列朝所未有詩亦爽豁恬集不傳

甕山耶律丞相祠作

迢遞荒山下披榛拜古祠衣冠猶左袵歲月已明時溪
遠泉聲細林深日影遲黃沙空朔漠誰與問荒碑

燕京歌

元會初分庭燎光君王親御紫霞觴不知五夜春多少

白日猶聞蠟炬香

塞上曲

龍沙近接古檀州多少從軍倚戍樓寒夜不堪愁絕處
西山片月挂城頭

九日獨酌

南山遙對菊花開欲采無人為舉杯縱說柴桑貧謝客
何曾不許白衣來

張四知一首

四知字子畏汝陽人嘉靖庚戌進士除刑部主
事轉兵部郎中出為四川按察僉事有韶亭集
上已送陳子韶赴浙東僉憲

明詩歸卷四十四
暮春燕地草萋萋冠蓋追隨漢苑西尊酒不須臨水泛
宮鶯已聽隔花啼風流遠媿山陰客麗藻新傳上已題
况是河梁明日別離裾莫惜暫相攜

陳宗虞 一首

宗虞字于韶閬中人嘉靖庚戌進士歷官按察

副使有臥雲樓橐六亭集

穆敬甫云陳君詩過於激烈

送胡生南歸

揚子江風落暮潮瓜洲夜月起蘭橈西湖歸去三千里
家在芙蓉第一橋

翁夢鯉 一首

夢鯉字希登莆田人嘉靖庚戌進士有兩川集

次沂州

故園杳無際淒然客思多雪中歸代郡冰上度滹沱野
戍孤煙出寒空一鳥過邊庭誰與晤獨賦式微歌

陳柏 一首

柏字子堅沔陽州人嘉靖庚戌進士歷官按察

副使有蘇山集

送正卿弟之黎平

匹馬迢迢渡五溪雙旌遙指夜郎西莫憎遠道猶千里
隨處花開更鳥啼

田汝麟 二首

汝麟涿州人嘉靖庚戌進士

燕啣泥

燕啣泥巢君屋不食君家米與鹽但借君家梁上宿胡為閉門相棄逐

遊空同山歌

空同山乃在涇水之南太白西危峰峭壁與天齊上有栖雲千尺之幽洞下有迴流萬折之深谿煙岑古木渺無際虎豹躡躑白晝啼憶昔軒轅帝問道廣成子煮銅荆山下鍊藥鼎湖裏道成騎龍飛上天空留玄鶴巢雲煙玄鶴招之不可得翩翩四萬八千年我來空同尋仙跡欲索玄珠遊無極塵海茫茫何處求山寒日夕天空

方弘靜

弘靜字定之歙縣人嘉靖庚戌進士累官南京

戶部右侍郎

王仲房云定元祖法盛唐而於王孟尤近若流水不知處幽禽相與飛不知春色減忽見林花飛永

日空山寂幽然時一吟宛然二君遺響也

東巖

巖端曙日輝巖下落松扉流水不知處幽禽相與飛青山長對席白髮久忘機試與西鄰叟攜壺上翠微

樂尚約

一首

尚約字孔源膠州人嘉靖庚戌進士由溧水知縣選授江西道御史謫安州判官遷懷慶推官被論削籍

詩話孔源宮詞不
失溫柔敦厚之教

宮詞

玉簫吹斷落花香空結流蘇五鳳皇不遣和戎即恩幸
敢矜顏色過昭陽

馮皋謨 一首

皋謨字明卿海鹽人嘉靖庚戌進士由刑部郎
中出為江西按察僉事歷廣東參議副使福建
左參政有豐陽集

泊鴛鴦湖遲友不至

野客饒春興輕舟坐夕曛湖光天下上暮色水氤氳
鼓連城動漁歌隔岸聞參差吹未已獨立望夫君

孫應鰲 一首

應鰲字山甫貴州清平衛人嘉靖癸丑進士歷
官南京工部尚書贈太子太保謚文恭有學孔
堂藁

華山雜咏

玉女窗開眼倍明仙童肅隊奏鸞笙海雲初散蓬萊股
人在蒼龍背上行

王一鶚 一首

一鶚字子薦曲周人嘉靖癸丑進士歷官太子
少保兵部尚書有春陵集

三月晦日

花外東風送馬蹄平原一望艸萋萋黃鸝苦欲留春住
深樹斜陽到處啼

張 翀 三首

翀字子儀柳州衛人嘉靖癸丑進士歷官兵部
右侍郎天啓初追贈尚書謚忠簡有鶴樓集

別貴竹諸友

十年與君遊千里與君別把袂意不言含杯氣欲絕漸
隔瀟湘雲空留夜郎月一曲瑤琴彈知音對誰說

登焦山夜歸

短棹乘風去輕輿帶月歸花香入徑細漁火隔江微遠
寺猶聞磬荒村半掩扉石橋橫渡處醉看海雲飛

潘季馴 一首

季馴字時良號印川烏程人嘉靖庚戌進士除
九江推官擢江西道御史升大理寺丞歷少卿
以僉都御史治河累官南京兵部尚書罷歸起
刑部尚書加太子少保總理河道有留餘堂集

詩話印川自嘉靖乙丑受命治河至萬曆庚辰工成著有宸斷大工錄
先後四總河務晚輯河防一覽其大指謂通漕於河則治河即以治漕
會河於海則治淮即以治河合河海而同一於海則治河淮即以治海
立意在茶隄束水借水刷沙以此奏功百年以來俱守其規畫可謂能
得大志者獨怪天啓初補謚列朝名
臣而公獨不與焉錄其詩為之歎息

除夕

行到海窮處仍驚歲盡時燈前誰共影愁裏強吟詩游
子歸何日芳春坐可期瀟城簫鼓動客思已淒其

梁夢龍 一首

夢龍字乾吉真定人嘉靖癸丑進士改庶吉士累官吏部尚書加太子太保贈少保謚貞敏

宿三川驛

寂寞三川驛風塵苦見侵王程方未已客夜且高吟山火延危嶺泉聲聒遠林幽懷良不淺何日慰招尋

曹梅 一首

梅字子和鹽山人嘉靖癸丑進士官郎中

沅州道中

亂山盤錯入沅州瘴雨蠻煙動客愁回首燕南家萬里斜陽誰倚故園樓

有懷

五落龍山葉三來鴈足書夢中親舍近天外故人疎寥濶乾坤裏疎狂醒醉餘秋風吹短髮溪畔獨躊躇

龐尚鵬 一首

尚鵬字少南南海人嘉靖癸丑進士除平樂知縣入為監察御史歷官右副都御史巡撫福建天啓初追謚忠敏有百可亭摘橐

詩話少南視醴雨浙總理兩淮長蘆鹽屯身處脂膏不能自潤集中虛室行云細視餅中久無粟舉火終朝待鄰曲長饑近午始一餐敢望豐年收萬斛自注三月中旬已嘗粟矣即此亦是難得

秋日園居

物候隨時變那堪問歲華晚風三徑竹朝雨半籬花自

明詩紀卷四十四
比禪居靜從教物論譁浮生何所有醉處便為家

吳時來 一首

時來字惟修仙居人嘉靖癸丑進士歷官右都御史掌院事卒謚忠恪有梧齋集

焦山夜歸

古寺探幽去山城倚醉歸留人林月上醒酒暑風微漁唱搖江渡村燈照夕扉獨憐沙上鳥已宿尚驚飛

楊 綵 一首

綵字質夫虎賁右衛人嘉靖癸丑進士歷官右僉都御史巡撫山西

雁門述懷

昔稱雁門郡嗟峨抱萬山樓煩隱天際滹沱水潺湲寒沙慘白日北風摧朱顏封侯詎非願王事顧多艱丈夫志四方茲游何時還

李 蓑 六首

蓑字于田內鄉人嘉靖癸丑進士選庶吉士除簡討遷南京禮部郎中歷官提學副使有太史集

詩話于田博洽中州人以擬楊用修而歸田之後縱情聲伎放誕不羈女優登場至雜伶人中持板按拍主人知而延之上坐恬然不為怪及去借主人姬上馬挾女優連騎而去此其狂態更甚於用修矣詩亦少深思絕句頗強人意

懷姚敘卿謫居

自從東郡別君侯吳楚茫茫悵遠遊故國鶯花牽客夢

大江風雨動人愁，偶緣散吏調琴鶴。無復題詩上酒樓，驛騎蕭條山海隔。逐臣心事兩悠悠。

嘉靖宮詞

四首

沉水龍涎徹夜焚，桂宮芝館結祥雲。壇前纔布諸天位，苑外先催學士文。

玉貌終年侍禁闈，每逢時節賜金緋。君王不愛纖腰舞，裁作雷壇拜斗衣。

小車飛曳向玄都，翠羽金翹笑自扶。玉竦樹邊長日市，內璫爭買大秦珠。

泥金檢玉祝長生，萬國封章止進呈。月滿西宮更漏永，九重風落步虛聲。

都城雜詠

西宮白日靜波流，小殿玲瓏夾御溝。花樹重重春爛熳，遊人偷上洗妝樓。

徐師曾

一首

師曾字伯魯，吳江人。嘉靖癸丑進士，選庶吉士，授兵科給事中，歷刑科左給事，有湖上集。

詩話伯魯說經鏗鏗，又斬文體明辨，以迪後學。一官清要，五疏乞歸。其述志賦云：相先民之不朽兮，托三事而流傳。吾何有一於茲兮，死速朽而猶憊。惜青春之不我與兮，忽已至乎衰年。胡不及時以精進兮，擇可修而勉旃。昔賢有言：耄耋未至，惜衰不及頓。尚可厲志於所期，又言進不及達，退無所矯。伯魯之謂矣。詩亦清婉，蓋斤斤學唐者。

宿磚河驛

渡頭風色晴，漁火隔沙明。帆逐暮雲落，潮隨春水平。長

蘆昨夜月甲馬舊時營關隘今無事稀聞擊柝聲

顧曾唯 一首

曾唯字一貫吳江人嘉靖癸丑進士除金華知縣擢浙江道御史巡按廣西引疾歸有閩越雜

咏

同賓峰集我渡山房

旅客貪呼伴芳尊共解顏清池來浴鳥高閣俯重山
酒松花細抽梢竹筍斑一作當軒夷猶二三子竟日不知還

姜子羔 二首

子羔字宗孝餘姚人嘉靖癸丑進士除成都府推官入為禮部主事終行太僕卿

黃太冲云太僕幼侍王文成講席不

登峨嶒絕頂吟

與詩人爭一聯半句之工然俊爽之氣涌出行墨之間不可掩也

君不見大峨之山矗西土乃在軒轅之臺列仙之府我
騎飛龍叩天戶九州歷歷皆可數初由平陸瞻青冥丹
梯翠磴愁攀登亦鳥伸而猿引斯颺舉而雲升下視大
壑不知其幾萬仞惟見長蛇尺蠖挂絕壁之蒼藤攀危
歷險趣未畢積雪陰風轉蕭瑟初疑雲自石中生寧知
日向雲間出普賢巖前雲日晴圓光倒照何熒熒擘然
五色相照耀有若虹蜺跨海掩赤城是非山澤氣無乃
陰陽精須臾雲散日西走光亦隨雲隱巖口對此喜極
心神舒聖燈又出南山隅初看一炬何趨趨少焉萬簇

皆東趨神奇鬼怪事殊絕銀燈火樹焉足娛歸來作歌
但坐嘯還問山靈有意無

下巖寺

一入招提境登臨思已牽地將金作界山以玉為泉僧
定魚皆出江空月自懸虛巖尊者像幻跡至今傳

鄭茂一首

茂字士元莆田人嘉靖癸丑進士除海鹽知縣
擢兵科給事中歷官河南按察使

過艸萍驛

古驛荒煙斷征驂向晚停吟回江雨白坐對越峰青萬
事皆蕉鹿吾生亦艸萍勞歌猶未已短缺復衝星

林命一首

命字子順建安人嘉靖癸丑進士歷官廣東按
察使有陽溪集

遊定惠院和韻

言尋僧舍出東門紫菊黃橙處處村秋盡遠峰含翠靄
天寒斷岸落潮痕山中花謝臺空在亭上詩成酒續溫
不見美人湘水畔數聲漁笛欲消魂

季科三首

科字與登江陰人嘉靖癸丑進士除行人選授
禮科給事中出為江西布政司叅政有雪浪閒
居二橐了菴鷗盟錄

詩話與登歸田之後田產所入悉以築圃圃在萬壽山麓中有六曲徑
蒼雪嶺賜閒堂雪浪湖湖中有青螺墩妙高閣湖上有寄寄堂紅雲閣
華陽洞天又鑿洞為小桃源中有赤城樓來鶴亭桃花泉曲水亭
雲林桐江片石恒與朋舊觴咏其間足稱好事詩亦安整不佻

太保顧惠巖公祇役泰山途次和答

紫極傳丹詔青霄訪玉華霓旌翻日觀瑤島接星槎寒
蹋峰頭雪晴攀海上霞翩躩雙白鶴遙駕五雲車

次韻答鄧薇山社長

袒席分襟地江關積雪天寧知廬阜約翻上汶陽船夢
斷清秋半書來白鴈前心期渺流水虛奏伯牙絃

曲水亭

飛瀑雲中響清觴石上浮蘭亭還我輩不減晉風流

侯 祁一首

祁字應文鄆城人嘉靖癸丑進士歷官

知

府

浮圖峪

雄關北峙萬山中天外浮圖接太空白馬遠從青海入
紫臺高與碧雲通秋風沙塞寒煙暝古戍旌旗晚照紅
自是聖朝無戰伐漢家不數貳師功

劉 侃一首

侃字正言京山人嘉靖癸丑進士由戶部郎出
為知府有新陽館集

隴西雜興

西極秋高白鳥翻憑闌送目到河源久無槎影通銀漢

明言卷四十四
十一
遙見天光下火敷青海風濤還積石玉門車馬半中原
崑崙故是征西路寄語山前吐谷渾

盛周一首

周字文郁秀水人嘉靖癸丑進士除知浦城縣
入為刑部主事歷郎中出知東昌府

詩話太守少從王龍溪遊與沈先生靖夫講學于聞湖書院遺址在梅
家蕩水中央其子姓至今聚族于斯聞其報最日忤分宜父子不得臺
諫蓋蒞
士也

蔡見麓過夜坐

南浦停車暝色催故人相見且銜杯月明何處吹長笛
落盡空山幾樹梅

王可大一首

可大字元簡吳江人嘉靖癸丑進士台州知府
有懸筒集

宮詞

承明殿裏諫章來封事君王次第
日斜猶自在平臺
以日昇平邊圉靜

史起蟄一首

起蟄字德龍江都人嘉靖癸丑進士

江上

溪雲窈窕海天晴檻外江流似掌平
午夢醒來無一事
水雲亭上看潮生

吳文華一首

文華字子彬連江人嘉靖丙辰進士累官南京
兵部尚書贈太子少保謚襄惠有濟美堂集

謁岳武穆祠

幾樹蕭森岳廟東一杯懷古酹西風凱歌竟負黃龍飲
信誓虛傳鐵券功無復翠華回絕漠最憐白鴈入行宮
神州恢復千年恨讀罷遺詩恨未終

方九功一首

九功字允治南陽人嘉靖丙辰進士歷官南京

工部右侍郎有息機堂彙

歐楨伯云允治詩嚴整夷暢
范介孺云允治音節清亮意極

雋永獨超物外
不啻一綺麗語

泊滄州有感

世事看流水漂零見此身他鄉猶是客失路竟依人樹
引長堤暮花殘故國春卷簾聊對酒幽寂恐傷神

周詩一首

詩字興叔錢塘人嘉靖丙辰進士歷官通政使
有與鹿集

赴天津

仲夏眾芳歇沃野羣卉凋曜景窮北陸薰風獻南陬伊
余赴期會東驚戒方舟晴雨遞昏晝涼燠變絺裘滌洄
見湖澳寂歷懷滄洲結髮事明主策勳慕前修名賤業
匪建時往命不猶才將世途左道與隱者謀漆園侈達
生柱下崇致柔優哉聊卒歲庶以謝愆尤

胡直一首

直字正甫泰和人嘉靖丙辰進士除刑部主事
出為湖廣按察僉事歷四川布政司叅議乞休
起補湖廣提學副使陞廣西左叅政歸有衡盛

精舍藏橐

孫山甫云正甫胸次洞然有物我同體之懷故其詩暢而鬱直而婉天趣獨深非追琢可及

登衡嶽

弱齡慕遐舉中為世網嬰雖抱及物志而非濟時英家
本衡廬交早負泉石盟秉憲涉湘沅吏事滋牽縈靈岳
奠疆域渺若隔蓬瀛恭承帝新命駕言自西征迴車恣
探歷使我夙心傾朝暎蕩雲嘯導我游上清吾衰疲塵
鞅學道未有成安得同心友眷言事耦耕

龍洲

窈窕繁花路清虛野甸居漸為逃世客嬾答貴人書水
閣依鷗鳥塵編信蠹魚日尋垂釣侶長到月明初

張潛一首

潛字用昭華州人嘉靖丙辰進士除戶部主事
轉負外改禮部歷郎中出為廣平知府陞山東
左叅政有東谷集

送遂菴相公巡邊

羽書昨夜入甘泉朔漠流沙起塞煙遂使至尊親授鉞
遙煩上將出巡邊望隆數入論思地寄重三持節制權
諸鎮安危憂不細宵衣應待凱歌旋

黎民衷一首

民衷字惟和從化人嘉靖丙辰進士歷官吏部
郎中出為廣西叅政

月夜吳舍人過集

向夕羣愁起幽期幸不迷天垂鳩鵲外城轉鳳皇西翠
暈淹宮漏春星散馬蹄十洲飛夢遠何路問丹梯

姚汝循六首

汝循字敘卿上元人嘉靖丙辰進士除杞縣知
縣遷南京刑部郎中出知大名府謫嘉州知州
有錦石齋集

詩話敘卿詩格不高然五古遠倣陶韋近體能宗大曆此
益藩漢南道人入之李何諸公之列目為盛明十二家也

夏夜對月

落日暑暫歇微風蕩靈襟
蠶塵淨庭宇竹樹森繁陰
皎月牆東來照見石上琴
揮手一再鼓悠然生遠心
鍾期久不作千載誰知音

秭歸立秋

晷運相推斥昨夏今已秋
玄蟬鳴不歇大火莽西流
人生寄一世漂如波上漚
乃為一尺組而來萬里遊
琴書委不理與言非故儔
曉起戴星行入夜尚不休
勞勞寡懽悰戚戚增煩憂
短景易以邁茲歲且復周
功名建何時霜華欲滿頭
自不堅始願及此將誰尤

自橫梁放舟還郡

解纜橫梁渡鳴橈濯錦川秋山初過雨夕漲欲浮天四
野明殘照孤城合暮煙媿無仁者政竹馬亦橋邊

半峰禪院遲同遊諸君

策杖欵禪扃垂藤交古路却顧後來人蒼蒼隔煙霧

回鴈峰

回鴈峰頭望帝京寒雲黯黯不勝情賈生已道長沙遠
今過長沙又幾程

巫峽書所見

巫山萬仞鬱嵯峨巫峽嘈嘈湧白波多少行人齊下淚
漁郎猶唱竹枝歌

施薦臣一首

篤臣字敦甫青陽人嘉靖丙辰進士官至順天

府尹

社日沽頭作

蕭蕭沽城東纍纍陌上墓埽除骨肉稀含淒當古路墓
上車馬喧墓中人不寤撼撼白楊枝怪鴟啼無數人生
若流水一去誰迴顧形骸草木姿詎比金石固往者何
足歎來者將焉措驅車此彷徨擬續招魂賦

卞錫一首

錫字叔孝嘉善人嘉靖丙辰進士除中書舍人

選吏部稽勲主事有豹山集

陳仲醇云分宜柄國言者以
蚍蜉撼樹不勝者止司勳往

往抗其威氣方袖封章彈之適聞親訃還
里故其居恒所為詩聊蕭不平感慨畢露

明詩紀卷四十四
事
曉舟即事

野寺侵雲出千家草色勻晚風吹浪白夜雨濕苔新去
鴈聲何急當樓鼓尚頻回看煙樹合殘月下城闌

鄭洛一首

洛字禹秀安肅人嘉靖丙辰進士除登州推官
遷廣東道御史累官少保兵部尚書兼右都御
史贈太保謚襄敏

冬夜獨坐

天涯歲暮夜淒淒鼓角初傳月已低一榻悠然成獨坐
不知身寄玉關西

曾同亨一首

同亨字子野吉水人嘉靖己未進士累官太子
太保南京吏部尚書謚恭端有泉湖山房集

贈趙大叅赴山西

雁門關外羽書飛帝念西征數解衣邊徼鼓鼙渾未歇
人家煙樹覺全稀無煩兵法儲行橐自請長纓出禁闈
十二屯田方略在策勳看拜徹侯歸

魏時亮一首

時亮字敬吾南昌人嘉靖己未進士以兵科左
給事使朝鮮累官南京刑部尚書

平壤拜箕子墓并訪井田遺跡

禹範留西土先生獨向東道無浮海歎義與采薇同舊

井存殷畫尋冠尚古風荒丘平壤外麥秀想遺官

沈節甫

一首

節甫字以安烏程人嘉靖己未進士累官工部
左侍郎贈右都御史謚端靖有太樸集

題且住軒

此邦非吾鄉此室非吾廬情知匪久客且復卜其居蕭
蕭環堵中俯仰欣有餘天地為逆旅百年亦須臾義娥
無停轂吾生自有初念此坐長歎秋風起庭樗飄蓬任
回颺素位恒晏如

張鹵

一首

鹵字召和儀封人嘉靖己未進士歷官右副都

御史巡撫真定改大理寺卿調南京太常寺卿
得張嵒崧銅梁書

萬里蠶叢寄一書開緘涕淚滿衣裾可憐話別六年後
同是招魂九死餘事過始諳渾失計眼前莫更問何如
寒灰老我冥心定汴水河干已結廬

沈奎

一首

奎字文叔江陰人嘉靖己未進士除戶部主事
歷郎中出為浙江按察僉事分巡嘉湖遷江西
布政司叅議有歸興集

富春

雨後衆山青汀邊雙鳥白挂帆趁西風遙看富春驛

沈啓原

五首

啓原字道升秀水人嘉靖己未進士歷官陝西
按察副使有鸚園艸

項里西楚霸王廟

符命通神契天心屈霸圖風雲空叱咤陵廟且榛蕪悔
失師中范徒憐帳下虞江東餘父老伏臘走村巫

同劉教授羅訓導再過福昌寺赴縣尉祝子餞

為踐東林約相要竹裏行升堂秦博士倚席魯諸生吏
道空馳傳賓筵再鼓笙不緣仙尉引誰共治遊情

懷陸仲長

京洛迫遊處春風次第吹官從一命始別是隔年期藥

裏趨中禁方書得上池正逢欣賞日未許動鄉思

謁宋真宗廟

玉輦巡游處荒亭半綠苔攀號龍已去瞻禮客重來漢
時空遺蹟秦封亦有臺何如恭己日稽首咏康哉

冬日偕袁池南楊完愚陳夔石餞盧外山鄉丈於

靈應觀觴咏移日

飲餞離亭日半黃飛雲落葉對清觴江山去住皆陳迹
賓主東南是故鄉翠竹含風仙院靜白蘋牽浪楚天長
追攀未盡登臨興野水寒禽又夕陽

錢

鎮

四首

鎮字守中烏程人嘉靖己未進士官兵部郎中

有淡菴集

許孟中云淡菴詩冲逸似陶韋

詩話守中從唐子鎮講學居弟子之首而詩無塵腐之習中年卜宅思溪掘地得宋王觀察永從墓承掩之而築堂其上不以爲忘也永從嘗刊五代史纂誤雜錄二書置本郡庠後取以補監本見陳氏書錄解題今思溪土人不復有知其姓名者矣錄守中詩附識於此

餘不前溪

苔水從南來真源自天目始出纔涓涓蛙跳雀可浴東風桃花水一夜高於屋百里下吳興一汛更一曲青山浮水面處處居可築艸玄伊誰亭名花間疎竹自昔稱餘不佳名豈虛辱

山中雜興

結廬傍青山繩樞爲牖生涯陌上桑行逕門前柳獨行媿偶偶顧盼無與偶策杖求友生陶潛去我久豈伊逃醉鄉翻念魯中叟寂寞柴桑間寄意千載後廬山舊遊路往跡今已朽古今諒同轍悵望一搔首

新晴散步

自啓郊扉曳履行傍溪雲日放初晴新篁拔地已數尺黃鳥隔林時一聲老去任情忘檢束客來廢禮闕逢迎家臨西塞清溪口坐看桃花錦浪生

田家雜興

細艸行來芳徑修篁覆處茅菴借問丈人生計薄田自種溪南

張祥鳶

六首

祥鳶字道卿金壇人嘉靖己未進士除戶部主

事歷負外郎中出為河東運司同知遷知雲南

府有華陽洞臺虛菴集

錢受之云道卿與七子同時亦相還往其詩以清潤為主不染叫囂

之習故不為時人所稱如云雁嘶

江塞月人枕成樓霜信警句也

詩話道卿詩滿瀟絕

俗頗類永嘉四靈

東平道中

驅車涉長道荒塗曠無人斜陽澹古木驚風翼征輪候
館葺牢落日暮寒城闌停驂一以憩振我衣上塵庭樹
集歸鴉依依得所欣如何客遊子不念平生親

新秋汎舟過西莊聽雨話舊

放船秋水落能載兩三人坐愛清波影輕搖白氎巾到
門纜繫纜藉艸便垂綸野飯無兼味嘉魚色勝銀

京口月夜惜別

春江明月夜不是別離時酌以桃花酒贈之楊柳枝轉
蓬身共遠倦鳥意俱遲明發天涯路青山惱夢思

園居

人境重重隔溪流宛宛分竹陰飛翠雨花氣結晴雲籬
缺牽蘿補圍蕪植杖芸禽言能細譯幽事賴先聞

上巳日寄鄭虛舟

三月三日春可憐百勞聲裏花如煙臨邛大夫有佳客
廣文先生無酒錢放歌誰和舞雩曲洗硯獨寫蘭亭篇
我欲從之問奇字出門無那春風顛

登北固山

孤峰縹緲赴江天白石紅塵樹杪懸一道澄波開斷壁
千林黃葉下寒煙鵬盤寥廓秋風急山缺西南落日圓
萬里中原勞北顧蕭梁陳跡酒杯前

申時行七首

時行字汝默吳縣人嘉靖壬戌賜進士第一累

官少師兼太子太師吏部尚書中極殿大學士

贈太師謚文定有賜閒堂集

馮元成云申公有韻之文對口立就不為叫囂亢厲

之音卑弱浮靡之調古體淵源建安近體沉浸初唐不事摹襲而自無不合

詩話趙尚書非識于廷益於早歲顧尚書璘識張叔大於童時傳者以為佳話先太傅公九齡獲見文定文定特起避席時先公未就塾文定留之邸第讀書一日從師出遊先公失足蹈汙泥文定命童子回取履童子誤持文定朝靴至先公不敢納文定笑曰履之終當踐我迹耳及舉順天鄉試同學少年有恃才者曰朱兆隆亦能成名邪文定佛然曰兆隆將大魁天下若輩焉知明年先公果臚傳第一其藻鑿不奕若此

文定不以詩見長然鍾篇長律鋪揚典麗足令操觚者縮手如云老去空悲千里驥秋來真憶四腮魚風度可想也

題清秋出塞圖

生不識醫無閭夢不到狼居胥瞥然示我出塞圖令我
目眩心神徂憶昔籌邊贊廟謨桓桓司馬傑丈夫帝授
節鉞臨玄菟高憑熊軾佩虎符榆關九月沙州枯霜鷹
下擊秋原蕪煙荒雲慘天模糊惟茲遼左僻海隅頻年
侵擾無寧都射雕躍馬彎強弧司馬申令陳師徒指揮
鐵如意玩弄金僕姑揚旌督戰親援袍萬卒超距爭先
驅奔狼突豕皆就俘凱歌入奏天顏愉司馬讓功歆若
無但云將士多勤劬何以勞行役請蠲幕府租何以恤
飢疲請發司農儲人人挾纊齊歡呼自從司馬歸江湖

遼人茹苦若董荼荷戈不解甲輓粟仍飛芻羽檄徵材
官絡繹在道塗震鄰之恐非剝膚騷動根本何為乎安
得再起司馬登戎樞坐紆長策銷隱虞國威震壘邊人
蘇

洞庭篇壽嚴中翰

崔嵬乎洞庭之山乃在勾吳之墟具區之藪芙蓉點點
七十二雙結青螺縮其口我昔凌滄洲振衣千仞巔西
登縹緲接銀漢東望莫釐生紫煙珠宮貝闕儼相向恍
似員嶠方壺天吾聞靈威丈人入林屋手探蒼水金庭
錄又聞毛公羽化留空壇時有鸞鶴來雲端茲山信美
多靈秘幽棲故是神仙地主人三殿倦揮毫出山便作
還山計只今六十早歸田攝生日誦叅同篇洞庭之水
釀春酒醉來恣拍洪厓肩

哭王子幻

慘澹江天裏何人問客星空傳懷舊賦無復艸玄亭物
外悲長往人間忌獨醒牀頭孤劍在永夜泣青萍

送初主簿罷官歸楚

吳苑初傾蓋荆門早挂冠宦憐潘岳拙曲和郢人難畏
路窮棲棘芳洲信采蘭浮沉何足問江漢有漁竿

大閱詩應制

廟略收羣策宸遊簡六師代當全盛日春是大蒐時雲
捧蒼龍駕風迴翠鳳旗轅門開複道帳殿繞行麾細柳

前軍駐長楊後騎隨虬鬚天策將猿臂羽林兒拂劍星
文動彎弓月影披連營分雁翼布陣合魚麗禮示三驅
正鋒藏九變奇張侯仍是豹賈勇盡如羆引滿雙鷗落
騰空萬馬馳元戎歸節制法從肅威儀詎數誇胡獵還
欣奏凱期大風歌漢士吉日誦周詩我祖犁庭烈先皇
保泰規永言思繼述持以贊雍熙

立春日賜百官春餅

紫宸朝罷聽傳餐玉餌瓊肴出大官齋日未成三爵禮
早春先試五辛盤迴風入仗旌旗煖霽雪當筵七箸寒
調鼎十年空伴食君恩一飯報猶難

辛卯元日

紫宸元會輟朝天咫尺無由捧御筵遲日曛曛虛正殿
非煙縹緲在甘泉王師未奏康居捷農扈誰占大有年
袞職自慙無寸補惟應投老賦歸田

余有丁 一首

有丁字丙仲鄞縣人嘉靖壬戌賜進士第三除
編修歷司業洗馬右諭德左庶子出為南國子
祭酒召入為少詹事兼侍讀學士遷太嘗卿歷
禮部左右侍郎改吏部進禮部尚書入直文淵
閣改戶部尚書兼武英殿大學士終少傅兼太
子太傅建極殿大學士卒贈太保謚文敏有文
敏公集

詩話文敏送肯甫
一律絕類劉文房

送張岨味

客行新霽後曙色啓城頭曉徑穿雲濕春塘帶雨流江
籬牽客思山鳥動春愁何事新芳歇王孫不可留

蹇達一首

達字子修重慶人嘉靖壬戌進士累官太子太
保兵部尚書

冬日登毘盧閣

塞雁南飛迫高樓北望寒暮雲千嶂暝積雪萬家殘四
海徵輸盡三巴道路難天涯對搖落那得旅愁寬

林煙三首

煙字貞耀閩縣人嘉靖壬戌進士歷官南京工
部尚書有覆瓿集

諸公餞送城南樓寄謝

冉冉歲云暮于役殊未休冠蓋集相送置酒城南樓微
雨霽朝景騁望消人憂蒼蒼遠山色浩浩清江流丹楓
羅曲岸白鳥戲中洲景物紛可悅驪歌促行騶衡門昨
棲遲杖屨忝從遊奈何遠離別一日如三秋索居感羈
旅久要慕前修適意豈非達狗祿良足羞山靈勿相誚
早晚歸林丘

府江渡

朝發陽朔崖暮次昭潭渡行邁千餘里孤舟日東驚川

途阻且長耳目漸非故巉巖夾崇山杖柯羅茂樹四望
寡人煙三時昏瘴霧深林蹊徑絕怪石波濤怒虎穴幸
徒蹤狼烽猶置戍客子獨何為艱險常道路雖懷叱馭
心寧免垂堂懼白日易蹉跎玄髮忽改素人生苦拘束
多為浮名誤萬事良悠悠達生庶可慕

苦雨述懷

我行赴京華征途纔及半渡江越淮南原隰何渺漫溽
暑當茲時氣候變昏旦迅雷激中宵陰雲翳層漢山雨
驟淋漓川流俄浩沔陽烏避何許水鳥羣相喚高浪沒
危橋飛湍瀉崩岸我馬淖不前我車鞞已斷屈詰歷羊
腸回顧屢顛汗僕夫仰天號客子撫膺歎吁嗟行路難
徬徨日將晏塵中苦局促物外思蕭散桂冠亦繇人何
事長羈絆

戚元佐 一首

元佐字希仲秀水人嘉靖壬戌進士除禮部主
事歷負外郎中陞尚寶司少卿有青藜閣橐

詩話吾鄉彭子殷論詩即尚七子然其詩不類也至戚希
仲則全以七子為圭臬余州列四十子不及希仲何與

早朝

鳳掖傳呼早晨趨逼禁闈天香浮輦靜宮漏隔花微仙
掌明河動周廬列宿稀不知風露重先濕侍臣衣

高則益 一首

則益字受所南昌人嘉靖壬戌進士官至四川

參政

聖駕大閱歌

平明仙蹕下丹霄千騎風雲擁射鵰盡道吾皇能將將
軍中誰是霍嫖姚

蔡可賢一首

可賢字子齊成安人嘉靖壬戌進士官至按察
副使有西征鼓吹

樓煩

山後山前十六州天涯盡處是偏頭雲開大漠風沙走
水折長河日夜流萬戶金縉愁見月千羣鐵騎畏逢秋
却思大漢無中策一曲胡笳倚戍樓

鄭履淳一首

公字伯寅海鹽人嘉靖壬戌進士除刑部主事
改尚寶司丞建言廷杖終光祿寺少卿有集

詩話昭陵繼世海宇宴清少卿時為尚寶丞初無言責乃上痛哭之書
至云物怪人妖天鳴地震彗星兩見於尾女日月繼蝕於元春鬼神告
凶苗害海至殆有陳涉阿骨打之徒窺伺於世雖李綱宗澤之才展布
猶難其亦過於激烈矣當日予杖一百流血縹緲至今遺袴藏其故宅

春閨

朝來靈鷲遶蒼鳴果得雲箋慰遠情但說別來長見憶
歸期依舊舊不分明

沈玄華一首

玄華字邃伯一字少河嘉興人嘉靖壬戌進士
除禮部主事歷官南京太常寺卿轉大理寺卿

詩話明南都太廟嘉靖中為雷火所焚尚書湛若水請重建而夏言阿世宗意請罷有旨并入奉先殿按長陵每自稱曰朕高皇后第四子也然奉先廟制高后南向諸妃蓋東列西序惟碩妃一人具載南京太嘗寺志蓋高后從未懷妊豈惟長陵即懿文太子亦非后生也世疑此事不實誦沈大理詩斯明徵矣大理性恬退不樂膺任歸遂潔白之養歿後玄孫傳弓撫拾遺集早夭失傳是詩獲於高工部寓公家

敬禮南都奉先殿紀事十四韻

高皇肇太廟松栢連穹寬尊祖有孝孫典禮適升躋一
從遷都後遺制終未睽有司列俎豆上公視瓚圭豈意
歲甲午烈火隳榱題禧禧出出音其兆先端倪盈庭議
移祀中廢成町畦猶餘奉先殿薦新及菹蕪微臣承祀
事入廟歌鳧鷺高后配在天御幄神所棲衆妃位東序
一妃獨在西成祖重所生嬪德莫敢齊一見異千聞實
錄安可稽作詩述典故不以後人迷

徐廷綬 一首

廷綬字受之淳安人嘉靖壬戌進士除刑部主
事歷負外郎中出知辰州府遷陝西按察副使
有錦泉集

胡松麓自瑞州以書見寄

搔首西風裏懷君思惘然江湖千里隔雲樹寸心懸客
淚隨猿落鄉書有鴈傳惟應今夜月相對共遙天

王叔杲 一首

叔杲字陽德永嘉人嘉靖壬戌進士官至湖廣
叅政有玉介園藁

詩話王氏為永嘉族望其先世毓生七子七子生二十八子二十八子
生九十四子九十四子生二百六子二百六子生三百五十子叅政其

一也三百五十五子生四百
九子其枝葉亦繁昌矣

初冬登大伾山

初冬飛蓋拂晴雲共陟嵯峨探秘文河勢已非神禹鑿
山形還是太行分崖端想象懸金粟洞口虛無散紫氛
登眺壯懷聊此寄酒闌歸路已斜曛

穆文熙四首

文熙字敬甫東明人嘉靖壬戌進士除行人進
司副遷工部員外改尚寶司丞轉吏部員外出
為廣東按察副使有逍遙園集

石拱辰云敬甫早年詩頗豪宕摩鍊既久遂臻

大

詩話敬甫論詩沾沾自喜亦強作解事
爾集為劉子威石拱辰所定又安得佳

送葉龍塘道長謫邵陽

重來燕市蹋紅塵驄馬憐君氣象新一疏即看成遠別
寒風冷雨入三秦

贈張弘軒都諫出叅晉省

馬度恒山萬嶺西天涯何處為招攜玄都莫道花如錦
一日東風盡作泥

聞拱辰符卿至自京志喜

漳水燕山道路賒相思常苦暮雲遮到來不必論時日
三見庭前木槿花

題乾山卷

幾年為客滯江關夜夜汾陽有夢還卷裏画图君莫看

斷人腸處是家山

楊汝允 一首

汝允字惟明南昌人嘉靖壬戌進士歷官姚安知府有九霞山人集

同日冊封六妃

宮花笑日草生春喜動天顏沐寵新同侍翠華遊幸地不知辭輦是何人

錢 貢 一首

貢字時庸桐鄉人嘉靖壬戌進士除知新建縣入歷刑部郎中有愛存棠

京邸懷歸適妻弟唐楷汀來謁於其還賦長句言

別

此日意不樂掩關有所思忽聞君遠來錯愕令我疑平生不辭鄉安得來京師去年與君別屈指已一暮南望懷故人日與浮雲馳嗟予坐羈束素顏日以緇金門盛才賢迂疎將何為感之百憂集歎息還自嗤君今馬首南握手復何辭投簪雖未能煩君語吾兒貧賤雖爾慙富貴匪我期願言各努力勉將門戶支予家柞溪東綠水環茅茨豈獨饒桑麻松竹植亦宜好闢十畝園樹藝須及時護筍編枳棘灌花引泉池待予此中老與君同柄遲此願良未果永懷常在茲去去勿復陳人生多別離夜闌欹枕臥暑雨捎翠簾

詩話錢公居斷山之陰沒莽山麓其後人至今聚族柞溪
左右桑麻松竹蔥蒨依然長篇不事雕繪有白太傅遺音

楊成名一首

成名字志完建安人嘉靖壬戌進士武進知縣
有遂初集

秋日郊行

路遶溪流細山迴樹色分客沽村店酒牛臥隴頭雲林
葉含秋露溪煙澹夕曛兒童迎我笑拍手自成羣

許國二首

國字維楨歙縣人嘉靖乙丑進士改庶吉士除
簡討歷編修右贊善洗馬遷南國子祭酒轉太
嘗卿協理詹事陞禮部侍郎進尚書入直東閣

加太子太保累晉少傅吏部尚書建極殿大學
士卒贈太保謚文穆有許文穆公集

擬御製勸農詩

四民皆天職嗟農獨苦辛所以古哲王巡省及茲辰簫
鼓吹幽詩訓迪良諄諄東郊土脉動好鳥鳴芳春桑間
拂其羽催耕一何頻乘時播嘉種原隰何勺勺念茲民
所天珠玉安足珍一日苟不作飢寒將立臻勿惜沾體
勞但憂年歲屯沾體勞尚可歲屯傷我民憶昔先皇時
端居軫郊闡載賡憫農咏丕揚烈祖仁禁苑籍千畝雨
暘零百神玉食豈不足貴令四海均九重高結念况爾
謀其身古人有良言歲計在於寅豈伊公家賦婦子亦

相親春風正發育萬物皆鮮新勉以東作力佇見西成
裡

秋聲

銀漢滄浪淨碧空天街一葉下梧桐霜前淒切兼砧杵
月裏悲涼斷塞鴻何處羈人驚伏枕幾回中夜感飄蓬
繇來志士輕搖落莫向西風憶桂叢

何洛文 一首

洛文字啓圖信陽州人嘉靖乙丑進士選庶吉
士歷官禮部左侍郎兼翰林院學士有震川集

詩話震川大復之孫仕維通
顯詩頗庸熟去祖武尚遠

章皇帝御筆白馬

臺上黃金駿毫端白雪驄玉花生御榻寶繪奪天工照
夜雙珂瑩凝霜匹練空瑤池仙馭遠猶見畫圖雄

周子義 一首

子義字以方無錫人嘉靖乙丑進士改庶吉士
歷官吏部左侍郎兼侍讀學士贈禮部尚書謚
文恪有交翠軒佚稿

送何小坡致政還信陽

海鶴遠矚網冥鴻謝鞞籠人間千丈絲安能繫游龍所
以達命士脫迹塵囂中眇茲盈尺組曾是羈我躬何侯
東海彥司牧早奮庸一麾指淮右載旆佐漢東斯民有
父母國論方爾崇朝宗甫竣事高蹈隨赤松薄言戒行

李云歸天目峰惜此遠行別不得少從容載歌驪駒詞
聊以紓我衷

林如楚 二首

如楚字道翹候官人嘉靖乙丑進士歷官工部
右侍郎有碧麓集

初秋齋居作

招搖指坤隅六龍忽迴軫清商應候至碧梧乘夕隕離
居及素節徙倚步華楯睠彼元運馳往復良有準人生
何勞勞年命如朝菌曩觀隨化徂新緒緣物引無以騷
人悲將貽榮公哂吾其解天弢去來守玄牝

會江驛

停舟異昔年城郭尚依然樹影浮天外江流會驛前暮
帆懸海月晴磬出山煙稍喜春來近居人話種田

陳文燭 三首

文燭字玉叔沔陽人嘉靖乙丑進士除大理評
事歷寺副寺正出知淮安府遷四川提學副使
歷漕儲叅政福建按察使右布政使江西左布
政使陞應天府尹終南京大理寺卿有二酉園

五岳山房集

胡元瑞云玉叔詩清
婉典飭居然名家

送楊惟喬侍御北上

驛路飛新雨荒亭落晚風賜環霄漢上擊楫大江中此
地曾留犢都人尚避驄春華今又半尊酒幾時同

送陳仁甫太史使楚

玉署承天遣桐圭錫帝封浮湘即司馬作賦是元龍春
盡寒江雨潮迴故國鍾禹碑如可辨還上祝融峰

送別

落日青絲騎西風白苧詞廣寧門外柳折盡向南枝

管大勳一首

大勳字世臣鄞縣人嘉靖乙丑進士改庶吉士
官至南京光祿寺卿有休休齋集

安慶渡李陽

客路荆舒盡江帆海國賒天風蔽晴日煙雨漲平沙水
闊疑無岸春深不見花暮潮南浦泊指點驛樓斜

洵

洵二首

洵字原荆無錫人嘉靖乙丑進士除永豐知縣
再知安福入為廣西道御史以建言落職為民
有采真堂集

詩話侍御以建言削籍任俠結客所識窮乏多受其恩歿後王承父
為具狀屠緯真為銘墓王元美為作傳咸盛稱之詩亦間有合作

過雅宜別業

不見王摩詰猶餘華子岡隔河山杳靄斷樹水微茫有
子開松徑留歡正夕陽漁舟投暝合杯外即滄浪

梅

隴上春風生江梅幾枝發仙人坐吹簫飛墮一樓月

潘志伊一首

志伊字嘉徵吳江人嘉靖乙丑進士除定州知
州升南京兵部員外歷郎中出知九江府謫知
陳州移紹興府同知轉南康知府以江西按察
副使備兵袁州以行太僕寺卿轄甘肅遷廣西

叅政

詩話潘公從游吾鄉沈石雲先生之門講學之餘
詩不多作所題存石草堂一篇即石雲之書屋也

題存石草堂

名園迴塵域參差開石林丹梯襲曉光碧嶂含夕陰昔
自鬱林來置此閑幽襟緬彼巨靈跡宛在梧江潯夫子
肯堂構誅茅面雲岑棲巖意已遠陟陌思逾深摳衣緣
磴道拭目見欽峯茲言懷仰止誰謂愜登臨

沈

淵一首

淵字子源濟南新城人嘉靖乙丑進士改庶吉
士授簡討進編修陞國子司業有中秘橐

塞上聞笛

何處吹羌笛秋風度玉關幾年愁作客此日更摧顏慘
淡邊雲合淒涼朔雁還梅花知盡落一夜滿天山

許

儻一首

儻字文夫靈寶人嘉靖乙丑進士除三原知縣
徵授戶部主事歷負外郎中出知漢中府調南
寧陞陝西行太僕少卿有後崖集

西坪路

蒼蒼古木中夕陽忽已晚
隔浦聞雞鳴人家知不遠

王圻 二首

圻字元翰上海人嘉靖乙丑進士除清江知縣
調萬安擢雲南道御史出為福建按察僉事謫
邛州判官兩知進賢曹縣遷開州知州歷官湖
廣提學僉事陞陝西布政司叅議有洪洲類藁

吳明卿云洪洲詩不落筌蹄不涉蹊徑惟意所適一無蹈襲 郭美命云遠之北地信陽近之海門所稱七子此亦一是非彼亦一是非諸君子為的而後進之士射聲焉未有能中者也先生詩雖其傑巧而本之自然謝其夸毗而歸之實際去其叫噪而由乎冲虛蓋矯志而獨行者也 陸伯生云先生詩近大曆貞元之際晚年冲遠入陶韋門與

詩話洪洲拜分陝之命即請告終養既歸松江之濱種梅萬樹曰梅花源仰屋梁著書門瀾皆安席現所撰續文獻通考謚法通考兩浙鹽志海防志三吳水利考稗史彙編雜錄尚多體例未當要亦留心有用之學者

觀忠惠祠有感

傑哉龍陽尉忠義今所希
民瘼一憤激抗疏干天威
手持登聞鼓口叫閭闔扉
但念流亡苦豈惜軀命微
雉經悟明主捐生視如歸
歲額減過半始願終不違
皇恩與士節千古同光輝
春秋薦蘋藻英爽此永依
遺跡炳簡策身沉名自飛
願爾賢達裔奕世延清暉

商丘早行遇雪

雲暗商丘野天連葛伯城
懷人宵不寐奔命雪仍行
粉絮因風舞瑤華帶雨傾
貂裘寒欲透客淚洒塵纓

歸有光 六首

有光字熙甫崑山人嘉靖乙丑進士除長興知

縣量移順德通判遷南京太僕寺丞有震川先

生集錢受之云熙甫詩無意求工
酒酒自運要非流俗所及

詩話兪洲早年評震川文謂如秋潦在地有時汪洋不則一瀉而已晚
歲乃作贊云千載有公繼韓歐陽子豈異趨久而自傷蓋悔之深矣詩
非兼擅然猶
勝七子成派

遊靈谷寺

晨出東郭門初日照我顏春風吹習習好鳥鳴啾啾巖
阿見黃屋登坡尋神山半日猶山麓十里長松間蜿蜒
芳草路寂寞古禪關画廊落丹牖朱戶蝕銅鑲殿起無
梁迥塏留玩珠攀蒼鼠戲樹捷野鹿看人閒山深靜者
愛日宴未知還

和兪質甫夏雨三十韻

浮雲方飄颻光景遂已戢淡旬深靈澍千里破封蟄茫
茫河伯歎蕭蕭山鬼泣靈曜邃高居朱明閔赫翕希微
澹將開浙瀝吹又急遇夜轉連綿醜流更淞漑萬壑嚶
霰鳴百川灌注入池容添紋殼林色浸淤浥離畢月暫
耿宿井星恒濕瀲灩湖光翻蹙咽海潮澀霓旌尚高翔
雲衣猶日緝水覆詎可收天漏誰能葺馬牛三江混鴻
濛九峰立嗟我來自東獨行阻虛邑夢裏思明兩筮坎
成洊習誰假卜商蓋但戴杜甫笠繽紛餘花落寂寞愁
烏集窮巷長閉門高河近通汲天地政氤氳雷風遞呼
吸悽悽聽晨鳥濛濛睇宵熠作又微時暘思文憂民粒
鼃黽費灰洒魚蝦饒掇拾廣室坐增悽匡牀聽生悒何

出度日闕安能使家給泥塗踏重繭梅潤侵什襲寒袍
故戀綈瀾簡慵啓笈顧歎風雲滿寧使蛟龍蟄短屐徒
齒齒折中空岌岌俯仰觀宇宙坱圠迷原隰阻饑知不
免寅亮豈所及

寶應縣阻風

夜泊淮陰城蚤向淮南路理棹逢西風猖狂恣號怒清
河千里中東風日相悞祈此一日風終竟不可遇蒼天
豈有心莫可詰其故但看北去舟凌風如飛渡翻為去
人快頓忘吾所務淼淼湖波深今日何可渡

邢州敘述

為令既不卒稍遷佐邢州雖稱三輔近不異湘水投過
家葺先廬決意返田疇所以泣岐路進止不自由亦復
戀微祿俶裝戒行舟行行到齊魯園花開石榴捨舟遵
廣陸黎棗列道周始見栽首蒼入郡問驛驢維當撫彫
瘵天馬不可求閭閻省徵召上下無怨尤汝南多名士
太守稱賢侯戴星理民政宣風達皇猷郡務日稀簡吾
得藉餘休閉門少將迎古書得校讐自能容吏隱退食
每優游但負平生志莫分聖世憂竚待河冰泮稅駕歸
林丘

甲寅十月紀事

經過兵燹後焦土遍江邨滿道豺狼跡誰家雞犬存寒
風吹白日鬼火亂黃昏何事征科吏猶然復到門

初發白河

邊風刮地起黃沙三月長安不見花却憶故鄉風景好
櫻桃初熟正還家

袁尊尼

三首

尊尼字魯望長洲人嘉靖乙丑進士官至山東
提學副使有集

長安感遇

朱華謝南土遊子客冀方豈不念遄歸簡書勞未遑悠
悠若懸旌倏忽意靡常魏牟阻江海蘇子怨河梁失路
良可悲曠望迷周行春陽念將歇滯淫非我鄉願假鸞
斯翼超飛歷故疆

長興徐太守自汝寧歸王元美諸君同集胥江分
韻贈之得關字

自薄淮陽守終然返故山江湖一麾罷歲月二毛斑中
論何當就浮名祇是閒因君夢苕水早晚叩雲關
送長兄再入留都

雲陽郭外艸萋萋作陣楊花路欲迷幾樹黃鶯啼不歇
行人回首晉陵西

李 栻

一首

栻字孟敬豐城人嘉靖乙丑進士官至浙江按
察副使

送友人還楚

南浦仙舟發颺風江上清故人從此去悵望若為情落日浮彭蠡歸雲滿洞庭思心逐流水西下武昌城

施 愛 一首

愛字欲周福州左衛人嘉靖乙丑進士歸安知縣有息菴集

寄李五

噫嘻復噫嘻與君恒別離祇隔一溪水相見良難期芊芊池畔艸灼灼園中葵倏然悲風來凋謝寔羨其思君令人老玄鬢忽成絲贈君青萍劍神物合有時

明詩綜卷四十四

明詩綜卷四十五

小長蘆 朱彝尊 錄

中吳 徐惇復 緝評

皇甫冲 七首

冲字子浚長洲人嘉靖戊子舉人與弟洵沔瀛

竝有盛名稱四皇甫有華陽集弟子循云兄詩兼綜諸體之妙而不能稱之以

一長盡臻名家之奧而不能擬之以一子此二陸辭藻獨秀於平原三謝聲華莫先於康樂也如樂府雄深古選雅澹歌行縱逸五言近體之典麗絕句之清婉差弱者其七言近體乎 張文寺云四皇甫之才子浚為冠 錢受之云子浚虞山紀游詩自為之序詞致甚美惜其全集不傳文寺之言亦闡幽之論也 鍾廣漢云皇甫昆弟詩如謝家兒女張燈蠟淚皆成珠鳳 靜志居詩話四皇甫詩源出中唐兼取材於潘左江鮑清音 亮節淨埽氛埃高蘇門華鴻山楊夢山而外無有及之者

順義戰

鄰有順義人告我庚戌事八月月生魄道傳俺達至朝
聞古北屯暮見遼陽騎李生正下帷奮激報守吏守吏
不敢言雙目乃直視馳馬歸赴敵城門忽已閉登城望
家室膏血乃塗地里開盡焚燒妻孥身首異李生按劍
怒皆裂聲色厲詎惜中山羹甘心河東棄惜哉無一兵
不能為之計乃有陳使君挺身獨不避下令開四門彎
弓插兩幟左書報仇文右寫勤王字當門據方牀潛軍
弛銜轡李生與之俱不覺增勇氣俺卒來覘窺一矢兩
人殪卒驚斫指奔倉皇解圍去城邑不破殘凡以二子
庇功高主不知事往名亦墜斯理自古然况乃居今世
請君勿復言此事猶為細

安山道

泊舟安山道忽見山南船銜尾若魚麗鉦鼓紛喧闐樓
櫓樹干盾笳箚插戈鋌瑠弓赤羽箭朱旗當檣懸長年
盡紅巾抹額絳絲纏言與郡盜鬪僅不為摧殘請看身
上創衣血何新鮮聞之不敢進倚櫂生憂煎載聞持節
使提兵羅河堧脫者有重聚獲者無幸全哀此封中氓
棄擲潢池開雖云饑寒故信也誰為宣懷保道不足政
刃皆深淵服妖古所畏涓涓乃滔天巢角鑿不顯此理
庶可研

上巳觀田橋袂襪望所期客

青山結層嵐新流漾周澤陽景屬良辰游人滿晴陌聯

明詩集卷四十五
二
翩塘上行去來江邊客拾翠行且留擷芳散還集臨賞
遲所思搖搖冀來覲夢寐時見之寤言忽復隔昔人三
秋懷宵旦今屢易為問修禊人憂心何能被

從田橋石徑赴拂水

江光開初霽山雲未全斂輕煙尚棲花積雨猶在蘚攜
屐遵迴麓援蘿上修峴環林何逶迤磴道幾回轉游心
自忘罷策足乃知蹇含章樂丘園耽隱易台鉉頓使昔
念舒乃得今抱展將尋出世人一往不復返

於巖石上眺東西兩湖

旭踐山中蹊午憩巖上石雲移石欲墮雨霽蹊猶濕倚
策眺兩湖波光渙相襲東若旣紆青西蘅亦凝碧芙蓉
落雙鏡天影浮重壁不覩水分流但覺洲如織檣烏有
離聲磯鷗無竝翼會茲物化情感彼高深迹從適得所
遣何為苦拘迫

維摩寺雨坐

回嶺無仄徑陟岡有夷壤展睇入空濛游心益昭朗長
風吹輕衣飄搖翠微上古寺迷夕煙明燈澹綃幌冥雨
從東來驚雷自西往林巒忽不見但聞山澗響景寂非
避喧心瑩乃成賞為禮沉疴蹤因之知幻象

送劉朝甫還吳

同游心事已成非忍向都亭復送歸二月渾河水尚合
三春禁柳色猶微舊來道路愁能記此去音書憶到稀

極目輕舟雲水上別君那得不沾衣

皇甫湜 三十五首

湜字子安嘉靖壬辰進士除工部主事調禮部
歷郎中改補右春坊司直兼翰林簡討左遷廣
平通判量移南京刑部主事進員外陞浙江按

察僉事有少玄集

文徵仲云子安詩沉蔚偉麗早歲規仿初唐旋入魏晉晚亦玄造鑄詞命意直欲窺

曹劉之奧而及之 兄子浚云子安體骨奇俊詞采英發陳風論則婉而不迫敘政事則直而不俚頌功德則豔而不誣不取妍於一字不求工於一詞詠之而有餘音咀之而無窮味 弟子循云兄詩錯綜魏晉而託宿於唐英特工五言而七言近體薄不經想其為篇也幽玄以通思春容以御氣婉麗以陳詞和易以達理憤懣以抒情絲綉以該事雋永以歸趣其始構也隻字不愜於心片言無豔於目踟躕窮思擁余寤索曾不少休是以吟苦則彌日不就神來則下筆立成 王元美云皇甫子安如玉盤露屑清雅絕人惜輕練短幅不堪裁翦 黃清甫云司直咀華八代會心古人每製一篇必經百慮故能盡脫凡近獨詣高遠晚薄杜陵之史心醉殷鑒之鑒擬之謝客則調頗適方之常建則音稍

振 錢受之云中吳文學歷有源流自黃勉之兄弟心折北地降志從之而吳中始有北學皇甫氏黃氏中表兄弟也子安天才駿發而耳目濡染不免浸淫時學已而軌躅攸分壹意唐風盡棄黃氏之舊學矣其刻迪功外集皆昌穀未遇空同之作深非李子守化之言以為知之未盡厥有旨哉又云子安少心折於李何子循長受壓於王李文章之道不惟以時代上下抑以聲勢盛衰良可慨也 陳卧子云少玄凝思選調意求雅則惟取境不廣無縱橫宕逸之致

詩話子安逸藻風飛清文綺合視子循工力悉敵 銖兩未分宜子浚之難為兄而子約之難為弟也

春日齋中即事

仲春氣妍和蘭薄幽可踐開軒眺遠野文霞靄曾嘯黃
鳥鳴芳菲綠蘋泛清淺感物懷古人緇帙聊自展嘗欽
柳下黜頗悅邴生免苟持齊物心得喪兩俱遣

秋宵宴會與周山人以言

嘉賓春清夜相與娛思憂憂思沉中曲惜別屈徂秋顧

念一世間快意焉可求別易會獨難世短歲復道促襟
展謔浪感此極歡遊明月懸中天芳華隨觴流妙歌激
雲漢爲樂四座周抒情告君子太康毋我尤

雜詩

凝霞晦朱陽繁雲結玄陰有滄興崇朝淫溢遂成霖
溜交簷曲浮苔冒水淥冥霧縈綠池悲風激丹岑惟彼
倦游客感此物序侵慕類興長懷含思寄微吟

秋日雜詩

廓處乏歡棕出門眺長衢悲風吹落日四顧無行車
蹉跎失盛年感慨獨嗟吁况我在樊籠六翮不得舒撫
劍思西邁安能守故廬淮陰困問里馬生戀邊隅桑梓豈
我志蓬蒿非我虞行行舍此去去去浮雲俱

贈韓侍御謫滁州

皦皦原中日照此城闕寒登山送歸客臨塗悵盤桓借
問子何之奇服涉江干遠斥千里道飄飄冒驚湍急觴
溯征雲悲風激長瀾我馬懷曾岡佇立發哀歎忼慨無
所道贈子以加餐

月夜贈伯氏叔季氏山人以言

歡游美清夜高會良在茲金飈薄綺櫺鮮雲蕩華池涼
氣發喬林湛露零丹甍皎月升前隅中庭粲其輝密親
旣已具蘭友相攀追繁音豈不奏所樂吹塤篪齊願等
金石皓首長不睽

送周氏

清晨餞我友，駕言遠徂征。前瞻齊魯墟，千里浮雲興。親
交豈不昵，懷役不遑寧。曠野饒悲風，揚塵翳邊庭。中衢
雪霰集，邊馬寒無聲。蹊谷無行跡，側足層冰橫。回首望
京闕，能不惻中情。子其祇自愛，順時保榮名。

省中贈別

祇役辭蘭省，驅車邁京陽。大江浩無極，游子心慨慷。疎
星斂華闕，朝霞興崇岡。平原一顧望，山樹靄蒼蒼。集送
臨城隅，轅馬各徬徨。道路豈云遠，各在天一方。念與我
友別，侘傺中自傷。

懷申生

昔我承嘉惠，竄跡大河潯。洪流逝滔滔，游子憂思深。回
風飄虛閣，索處悲難任。申生蘊璵璠，投分義所欽。綠綺
久不奏，為予激哀音。眷眷感離志，冉冉遂逮今。晤言恍
如昨，一別歲載陰。微我殷思勞，非爾誰為心。

十四夜月

廣庭淨霄色，良夜月流翫。况對巢箕人，同懷發幽讚。散
步林暝交，微星吐華粲。彼美雲中魄，徐駕升清漢。玉彩
含霜來，金霏隨風散。繁絃起兩階，孰知我心亂。

十六夜月

明月有常翫，員景亦不易。三五昨已邁，人生良如寄。興
雲結長霄，清暉何由被。弦望相推移，賞心邈難嗣。即事

可逸生取樂在適意綴我已人響歌之聊代匱

十七夜月

清風歷網戶皓氣流中庭佳期殊惠來金波耀華星諒
知蟾兔缺髣髴素娥形為樂貴及時百年詎我齡放歌
目馳藻結思凌高冥且念參酒德萬物如浮萍

予嗜琴山人張子妙得古法嘗學焉而予輟響久
矣舟夜臨流對月發琴而彈之興慨命篇

伊予寡世姿由來慕丘壑長從嵇生玩假物思所託匪
盡至人理聊敘逸民樂改服睽宿心久負長往諾石房
綴幽響泉蕊迎秋落沿沂開昔襟浮彈昨間作滄波流
潺湲明月照灼爍想見乘風人長懷披雲鶴且以慰營
魂拊心終繇邈出處焉是非俛仰笑今昨

元城書院示諸生

予昔慕丘園守道甘時棄弱植踐芬華介石慚貞義一
朝世網嬰來為河曲吏迨茲民務隙肅徒究經事廣除
氣暄妍衆芳粲以賁清風間鳥雀日華搖薜荔高閣敞
雲霞游目適我志雖無兼席長頗協下帷思相與觀四
教宅德歸一致忘筌勗所期反約良為懿

夏日幽居述懷

九巖多靈樹秦望有飛泉臺尚逝云久披籍慕其言念
當去人羣返耕南山田即林事經始荷蓀開雲煙疇昔
嬰華組芳歲屢徂遷憂思徒以積志髮坐相捐常恐衝

日言然卷四十五
七
飈激鳥路不及旋彼美淑人情緬邈誰爲宣

雜興 二首

薄雲散清澍秋氣滋寥廓傾暉奄西陸涼飈淒叢薄羈
人苦物役容華逐年鑠沉吟覽時化空堂寂不樂惟我
同心友守道厭蓬藿高舉遺萬物逍遙處一壑永念從
之游無爲自束縛

驚節流炎紀馳暉屆清商游魚湊重淵蟋蟀鳴空堂白
露滋滋前墀陰風來北房我心亦何思所思天一方離居
宛如昨再覩鴻鴈翔含情撫遙夜申旦獨徬徨哀彼采
葛詩零淚霑衣裳

茅山

杳靄登春山嵯峨入雲嶺徵奇不覺遠發興日初永石
叢孤亭秀花覆仙竈冷長揖山阿人坐使塵慮屏

自溪口歸

朝來醉別酒溪上孤舟還遙村轉江路落日迷松關平
波望煙樹百里滄茫間坐愛丘中事春雲留碧山

將命巡軺徒倚署閣

彌辰倦紛牘徂春悵無樂庶以散予襟獨此稽山閣霞
蔚見層巒花深隱羣壑本自滄海人悔吝滋縻爵旋里
東江軺徘徊眷林薄俄頃惻幽衷遇物悲離索且憑浮
雲征聊希至人託

使中都道中作

日言然卷四十五
將命適遠京風駕戒征侶臨流別友生野塗曠延佇靖
恭爾所敦我志不遑處揚旆越修垵舒節薄蘭渚日夕
秋風生曾是歲不與淒淒聆候蟲肅肅望歸羽蘊結愁
我心沉憂誰能去悟彼詩人言歸來藝稷黍

發郡城之天台道中述所經覽寄孔謝二憲副趙
何二僉憲同年

夕夢曾城阿曉行滄波上縈溪復含流連岑時隱障風
湍信千轉雲峰非一狀錦績紛迎翫氛氲忽彌望蘭泉
芬可掬苔壁險難傷思偕同懷子攜手追禽尚

由桐柏嶺趨瓊臺遊眺

桐觀臨雲壑遙從此路迴石門藹天闕借問幾時開鶴

羽下清漢仙蹤空碧苔山人仍自去日暮嶺猿哀

十六夜月

牛渚風流地清江萬里長今宵懷謝尚乘月益清狂勝
事已云盡佳期何可忘涼風吹舞袖白苧滿秋霜

春日金元伯見過

當時好奇客頻過旅人居及此歸來日翻憐會面疎花
前茲夕醉湖上隔年書意氣君休問嗟今已不如

致道觀溪口

宿處玄林靜鐘聲清夜初星河山嶠滿雲霧洞門虛竹
下邀中散松前問隱居溪陰是天路獨往意何如

和子約莊遊對修和觀懷往

仙宮綠縹緲孺子問滄浪獨望青山郭空懷碧草芳田
疇諸島接雞犬百花藏何以寄幽興前溪春水長

靈峰

靈峰望縹緲疑是接曾城梯繞丹霞入人攀碧樹行洞
門山日落石室海雲生何事吟招隱空令猿夜驚

再別兄弟作

可歎江潭客重為魏闕游河梁一悵望芳草劇含愁隴
樹三年淚邊雲萬里秋無由慰棲泊羈影任悠悠

宴東河流杯亭送歐陽大參赴蜀

流杯亭上酌修竹亂溪紋暝樹煙常合春山雨不分別
情依去鳥客路入重雲懷舊仍傷遠勞歌夜獨聞

席上送子循弟

離樽日南至行役魯東門海徼雲千里寒城雪滿原聽
歌仍有淚執手已無言何異飄飄鴈年年別故園

早秋楊村旅次懷伯氏季氏

滿川風露急涼度海門初薊葉先秋下江星永夜疎客
心憑北極鄉路憶南徐塞鴈何時至平原有素書

寄懷諸兄弟

萬里南飛鴈何時塞上來客愁懸落日鄉夢繞胥臺投
筆情猶在垂竿老未催淹留此懷舊長使壯心哀

聞家兄之金陵

聞君理孤櫂欲向金陵遊却憶追歡日翻成羈旅愁鐘

流客館夜砧響帝城秋得似滄江鴈東飛白鷺洲

過維揚作

念昔恭明祀三秋滯楚鄉今來還上國五月渡維揚戀
土情何極瞻塗意轉長川原歷迢遞煙樹引微茫浴渚
飛鳧下驚沙白鷺翔江隅有芳草幽思獨難忘

皇甫汈 三十九首

汈字子循嘉靖己丑進士歷工部郎中謫黃州
推官召為南京吏部郎中又謫開州同知量移

處州府同知陞雲南按察僉事有司勳集姜玄仲云子循

詩全效康樂 王元美云子循今體風調頗似錢劉 穆敬甫云皇甫伯仲以詩為業各臻妙境而司勳尤為白者 胡元瑞云子循五言清空蕭灑色相盡空雖格本中唐而神韻過之

詩話百泉清音藻思五言整於小謝五律雋於中唐惟七言蕙弱兄弟攸均集六十卷自言始為關洛之音變而為楚再變而為江左三變而為燕趙四變而為蜀既返初服取篋中豪檢閱凡興寄未深格調不古語非絕俗句非神采者刪之且曰有志慕古而力不逮心恥時尚而薄不為又言關中之詩猶燕趙之詩屬齊魯之詩侈河內之詩矯楚之詩蕩蜀之詩澀晉之詩鄙江西之詩質浙之詩嘽吳下之詩靡有高視一世之槩焉要其五言清真朗潤妙絕時人匪徒火攻伯仁而已

過武城謁言子祠作

溯風枉輕帆戴星理扁櫂超忽之武城有蕩瞻魯道古
邑一何卑令猷久彌劬弦歌謝清響精華契深造曰予
廁文儒眈寂違時好剖符辭帝京腰章宰名趙諒乏操
刀資懼貽製錦誚經過緬遐躡神對宣幽抱言采江上
蘩薦此廟中貌誰謂千載殊可以同高調

奉荅子安兄

江郭改故陰家園藹新霽柔條始發林芳草漸紆砌潘
居信為閒楊亭况重閉曰予忝明時與子承嘉惠分省
各有讐佐郡慙所涖暫就北山招轉愜東田稅情忘桃
李言跡豈匏瓜繫感遇興長謠來章緬幽契

寄懷王道思

本乏希世姿翻為逢時誤良友豈不懷遄征詎顧日
暮勞所思凌風未成晤將從夢寐求緬邈山川路

秋夜把酒對月

宋生陳九辨陸機歌百年悵茲清秋日聊使幽懷宣矯
矯歸雲鴈嘒嘒含風蟬摧芳委朝露俄景流夕川鱗運
有代謝薜榮無常妍始知行樂貴何用居情牽長夜思
秉燭新月正登筵金尊泛綠醕寶瑟絙朱絃商歌當棗
下楚舞出花前餘名焉足藉達生乃為賢

仲秋之月諸弟燕私風月雖佳雲雨或間

五首

奉義游京邑數載違親宴迢迢明月光照我越江漢何
如故鄉夜及此清秋翫鏡彩攬未盈璧景委纔半桂樹
敷丹英華萼紛相煥雖謝西園棕庶附南枝翰

良辰信具美清夜永為歡明月已幾望華彩流雲端廣
庭置芳座高會列盤餐但云杯行緩不惜露下寒情來
感今易跡往戀昔難一聞關山曲猶似別長安

敦賞每卜夜行樂聊及時秉燭且不寐待月豈云罷鱗
鱗玉葉薄皦皦金波遲高臺臨窈窕迴塘生漣漪載歌

蟋蟀唱復詠鶴鴿詩清輝一以鑒素心同所期
嘉月有餘照歡晤無限情寵弟載旨酒要我坐華楹
齊莢復萎桂滿輪乍傾忽忽愁霖至瀏瀏悲風鳴員缺
遞相運明晦焉足驚太康靖往訓知止崇令名
肅肅斂朝雲娟娟收夕霧江上珠始來天際鏡方露列
宿齊掩縟凝霜共呈素嘉肴尚堪薦美酒猶足具良友
且無歸劇飲酬茲遇所願揚末光何辭照遲暮

秋宵酬子安兄作

清夜游家園眷言懷丘壑素月升員靈千載共寥廓始
出東南樓俄頃西北郭華燭滅蘭堂金波蕩羅幕雖過
二八時光彩紛綽約商歌正流響魯酒亦未薄人生貴
適意胡為坐羈縛結髮從至今朱顏悵非昨冶服豈常
翫榮名焉足託良會聊具陳麗藻復聞作穆如揚清風
粲若敷春萼申意忝惠連何以獻康樂

秋日往梅林莊居

疏公守舊業班生慕常廬薄游千里外一出十載餘偶
與密親邇怒焉懷所居東林扉尚偃北郭逕始除青山
藹盈戶綠水湛通渠流盼悉成往眷言思遂初將從古
人學乞歸事耕畬顧驚年跡乖坐使情興紆

冬日往虞山作

故鄉誰不懷名山矧予慕一為塵跡牽遂闊賞心晤偶
值芳歲闌遙泛滄洲趣澄江帶餘霞丹壑收殘霧嚴霜

明詩紀卷四十五
十三
委野草寒飈振皋樹指塗尋舊蹤流盼成新寓魚樂媿
淵沉鴻冥羨雲鷺歸來徒見今履往悵非素

送陸宜甫還洞庭

烈士晞康衢逸人免幽壑矯翼鮮寧棲潛鱗有深託陸
君箕穎流雅志甘場藿被褐自行吟持經事耕作別來
歲屢道念往迹猶邈避亂辭東山韜光翳南郭聿暮促
歸心申章敘離索雪積湖上居雲停林間閣挂席迴青
陽援琴遲芳酌願保黃髮期無渝素心諾

臘月十五翫月荅子約

員景攬兔升馳光感駒隙西園將密親南樓遲佳客生
無百年期能幾三五夕旨酒盈樽壘高堂闌琴瑟請誦
唐風詩胡為坐拘迫棣華眷季方摘藻凌希逸往晤迹
易陳來悰會難逆再滿清夜輝寧知芳歲隔

偶懷虞山之游因柬張比部寰

我昔虞山泛登臨暮景斜雨迷當岸柳風度隔巖花奈
此淹京邑傷哉歷歲華張騫高興在早晚待星槎

送陸給事燦謫都勻驛

國論何年定鄉心此夕搖鴈飛天畔驛龍隱日南橋謫
宦恩非薄居夷路詎遙誰憐梁太傅淚灑漢文朝

蠶室成

蠶館開周典鸞輿扈漢儀棘牆春窈窕桑沼晝漣漪
獻夫人日衣明上帝時娥媯御王母玉珮降瑤池

泊維揚

地是南來域江分北望賒空餘前代宇不放昔年花物
色圖丹壁春風想翠華誰憐歌舞處日暮有啼鴉

臘月十五夜

坐惜青天月能餘此度員乍來梅蕊下猶滿桂叢前江
浦潮難落關山思可憐催人三五夜含照入新年

承天候駕

二首

東幸方過沛南巡乃至衡翠華臨楚地黃屋駐樊城雲
以朝歌白河因夜渡清寧知天子貴別有故鄉情
茲地承嘉惠仙班喜復從天行傳駐蹕月出候鳴鐘禮
樂河間事山川灞上容由來江漢水何處不朝宗

靈巖

棟宇開靈嶽池臺隱廢宮已看塵劫遠猶想霸圖雄野
霽呈秋色濤喧見晚風從知挂帆意遙在五湖東

十月十五夜月

清漢月仍滿空山歲欲闌入林無葉礙映水覺池寒遠
道心千里高樓思萬端誰能三五夜長及盛年看

舟中對月書情

不識別家久但看明月暉關山一以鑿驛路遠相違影
落吳雲盡涼生楚樹微天邊有烏鵲思與共南飛

騎省

騎省慙三入鶯花過十春心徒懷許靖鬢已似安仁香

草思公子明珠報美人那堪秋水上猶此隔迷津

託宿報恩寺

平野新秋入長干舊寺存青蓮非世界綠竹是山門塔
火看生滅鐘聲悟靜喧迷方欲有問慙對遠公言
諸君乘月攜酒見過遲謝山人不至席上作

芳樹長安道春宵動旅愁一尊良燕會四海盡交遊玉
漏寒頻度金河靜不流清輝憐謝監何事隔南樓

寄子約弟

兩地承嚴竄同時罷省郎因書問舟楫何日下沅湘客
夢頻棲月征塗欲戒霜平生題賦意那得倦游梁

生朝寄兄弟

白髮逢初度清尊思惘然鶴鴛原上夢犬馬客中年
看字將雲結心旌共月懸朝來淇水望時問渡淮船

早春寄子約弟子方有悼亡之戚

獻歲思吾弟何時報徒官夢勞池上積書到洛中看太
史身猶滯潘生淚未乾梁園飛雪盡欲下剡溪難

送王亮卿遊天台

嶽路從茲始仙源信可求客情臨海嶠鄉語永嘉舟天
外看霞起林間聽瀑流無能解纓去送子欲神遊

九日寄子約

漫有登高興兼當望遠何對花驚白髮見鴈憶黃河亂
後書來少霜前木落多不堪羈宦日同是阻干戈

夢子安兄作

一為生死別，獨宦尚飄蓬。
白首行荒外，青山值亂中。
九原人豈作，萬里夢猶通。
今夜看春草，池塘思不同。

登天平廢寺

古寺空山裏，重來感廢興。
尋谿迷蔓草，攀壑藉危藤。
遶樹多寒鵲，然燈止病僧。
獨憐青嶂外，猶見白雲層。

與鄭司士夜話

故國經年別，他鄉會面難。
人疑天外至，花似夢中看。
山嶂侵羶濕，江流遶舍寒。
不知臺省客，誰念一儒冠。

七月六日張幼于館燕別將赴豫章

祖席叨君燕，蕭齋與客過。
旱雲涼思少，江月旅情多。
著

作慙金馬遲，迴戀薜蘿欲。
知臨別恨來，日視星河。

由菴画溪登玉陽山院

溪水鏡中渡，風帆画裏看。
潭猶名玉女，地即傷銅官。
向夕山常雨，先秋樹已寒。
洞宵供奉日，歸隱聖恩寬。

荅徐紹卿見懷

停雲遙引望，良晤近何疎。
以我丘中想，開君湖上書。
花飛人別後，木落鴈來初。
祇為懷徐孺，長令夜榻虛。

何內翰招讌獲聞聲伎之盛

房中樂自舊京傳，促柱輕調慢拂弦。
曲罷周郎郵得顧，但聞餘響落燈前。

皇甫濂 七首

日言集卷四十五
濂字子約一字道隆嘉靖甲辰進士除工部主
事謫河南布政理問稍遷興化同知有水部集

孫齊之云水部詩清曠罕儷其志亦復玄曠 黃清甫云水部詩意玄
詞雅律細調清長於造景務在幽絕雖物指區中而神超象外會其獨
詣斯可與言詩矣 兄子循云子約詩每出閒曠彌覺沖逸興到詩
成曾無造次應酬之語 宋韓文云子約盛有才名其詩頗傷浮急
詩話蔡子木哭子安詩云五字沉吟詩品絕一官憔悴世塗難子于鱗
送子循詩云吳下詩名諸弟少天涯宦迹左遷多子約宦亦不達與諸
兄同詩稍
不逮也

赴洛留別華陽兄

浮雲薄高山崇朝去還結游子不憚煩悠悠復徂轍密
親自茲曠臨流何能發衰林動遠風寒江冒輕雪遇物
隆所悲興愁頓難絕無以赴洛人懷哉但吟越

不赴郡檄荅子循兄

矯翻思霄翥游鱗託淵沉物類各有適殊塗難竝尋豈
伊世網慮擾擾誰為心振衣還東山寢迹棲舊林江海
多風濤舟楫弭川陰無令衝波激但恐歲序侵願言謝
西府谷口有徽音 陳卧子云
固是雅人

悼子乘

冥冥雨露集熙熙歲始更靈蠢各有化人理獨無生念
我泉下子一絕如朝榮生男以待終胡為邁天塋清塵
布虛室寒晦凝軒屏流日無存影涕淚交霑纓恫懷何
能已歎息每遺聲堂闈曠基跡詩書空復盈奚但腸九
迴心膂成頽崩媿乏延陵達無乃傷我明 錢受之云水部悼
子不減安仁悼亡
昌平登陽翠嶺望居庸

漁陽通古北上谷邇皇州縣山帶西日重關枕滄流澄
霞澗影分歸雲嵐氣收陰厓忽成晦夏色驚先秋無以
行邁心恤此烽煙愁伊昔布駿略婉矣幕中籌匪今重
俠士自古并與幽傷哉投筆懷白首何所求

從僧簡經說難

少乏經世姿長逢行路迫何為百歲閒坐使千慮積薄
從沙門游聊與同所適風遠水木華雲興梵鐘夕委叩
愛良託空情藉深譯曾是投石心對爾翻經席迺協支
許懷焉貴軒冤客初服儻有期永願庶可畢

歲暮

季冬違淑候但見玄陰結物化各以時胡能隆所缺潛
深有神鱗鳴條感微蛻霜雪塗我庭何由吐芳茁諒此
達化先匪伊明且哲

送子循家兄赴嚴相公召修志袁州

江水去悠悠征帆不可留一尊相送盡千里共含愁雲
樹依殘日霜笳動早秋猶憐覽風物書記在袁州

馮惟健

二首

惟健字汝強臨朐人嘉靖戊子舉人有治泉集

朱中立云陂門奇思駿發古逸冲逸近體嚴整蓋傑作也 錢受之云
汝強兄弟四人三人皆有集以才名稱齊魯間獨惟重無聞焉而文敏
公琦則惟重之孫也魯王孫觀樞撰海
岳靈秀集論三馮之才則首推汝強云

登觀音寺

天削孤峰峻醫閭最上頭窮巖藏古寺懸石結危樓雪

瀑千林潤松門六月秋夜來禪榻卧天漢掌中流

姑孰道中

煙起樹色暝水生江岸仄夜來別故人風雨最蕭瑟

馮惟敏 四首

惟敏字汝行惟健弟嘉靖中舉人謁選涑水知

縣改鎮江儒學教授遷保定通判有海浮集

朱中

立云海浮詞雖逸而氣弱律雖協而調卑 王元美云馮汝行如幽州馬客雖見伉俪殊乏都雅 錢受之云汝行樂府感傳東都當在王漢陂之上詩雖未工亦齊魯間一才人也

七里溪別墅 二首

知足始遠辱至人貴自全不羨公與侯所志受一廛吾家有舊業乃在城東偏一丘藏一壑宛轉依清川生涯

故不常中道成棄捐棄捐從此去一去二十年非無五畝宅在邑多糾纏幸茲協初心歸我汶陽田

我田無遠近處處綠澄溪朝發巨洋潄暮泊野水棲野航流北陸香稻來東齊豈伊貴異穀美利貽烝黎名山近村落迨暇恒攀躋仰瞻霄漢遙俯眺浮雲低翩翩比翼鳥乃在太行西終歲不合并激昂飛且啼

詩話臨朐治源山水勝絕高梧一林脩竹萬个泉流其中鄒善長所云分沙漏石者也土人謂園是海浮所築縹馬林間想見東山絲竹之盛後游莫再恒繫於懷讀先生二詩猶不禁神往

東郭次甫

送子游東岳五月渡長淮誰言獨往人

次甫自號獨往也

中道臨

當垂乘流豈不返因以安子懷一諾重平生三年今始

諧心期在山水所貴敦朋儕秋日動遐思良夜間高齋
螢火照裳衣蟋蟀鳴庭階何時披素襟一笑遺形骸

石頭城有懷

石頭城畔枕寒潮坐聽疎更夜寂寥生計已拚尋舊隱
窮年猶自滯歸橈空悲浪迹淹三楚無復傷心問六朝
稷下故人知健否何時散步汶陽橋

馮惟訥 五首

惟訥字汝言惟健季弟嘉靖戊戌進士歷官江
西左布政使以病請老特進光祿寺卿致仕有

光祿集

朱中立云少州詩俊逸秀麗縱橫繩墨間 王元美云馮汝言如晉人評會稽王有遠體而無遠神 余世用云光祿詩冲雅和平取則開寶 錢受之云汝言撰漢魏六朝詩紀自上古以迄陳隋網羅放失殊有功於藝苑評其詩者以為博洽多記自出為

鮮

詩話光祿詩亦華整可觀三馮竒稱其賈氏之偉節乎

吳郎坐見人餉衣香戲贈

湘君搴薜荔魏帝采薜蘿盤龍連理帶翠鳳合懽襦不
能機上織學作府中趨定知香十里終然傾五都

朱近修云六朝

遺響

春初玉泉觀餞別史子

地擁秦亭北天臨渭水南樓臺千嶂起雲樹萬家涵塵
劫何年盡仙宮此日探春光正可惜願一駐征驂

送龔侍御清戎滇貴

天王按劍欲專征詔使分麾十道行玉璽夜開鳩鵲觀

樓船春下鳳皇城日南島嶼揚旂度徼外蠻司擁傳迎
不用軍書馳朔漠年來百粵未休兵

秋日寄懷家兄

燕山水落鴈來遲遠客南歸未有期明月雙懸江海淚
秋風一寄鶴鴒詩淹留賈誼才無敵漂泊馮唐鬢欲絲
最是昭王遺恨處黃金臺上草離離

秋日同參伯邵公遊鳳皇山

鳳皇高閣俯晴空萬里蠶叢此路通遠近村原秋色裏
參差草樹夕陽中尊前舞袖翻霜葉天外清笳咽塞鴻
回首舊游成夢隔獨將遲暮歎征蓬

卜大同二首

大同字吉夫秀水人嘉靖戊戌進士授刑部主
事歷官福建按察副使有監泉集

同戴前峰遊赤壁

共有探幽興言尋赤壁遊昔賢不可作吾輩復相求孤
鶴今何在長江漫自流因之重懷古對此且淹留

楚中思歸

久欲辭塵網拂衣返故廬水田原不薄茅屋亦堪居五
斗何為者三湘安所如勾留猶未去豈羨武昌魚

卜大有二首

大有字謙夫嘉靖丁未進士除知無錫縣調潛
山遷南禮部主事終尋甸知府有益泉詩藁

秋日游牛首奉和賓巖韻

黃菊枝頭未破叢
曉臨蕭寺野煙空
九江波浪開天塹
六代繁華想帝宮
醉後幾吟豪士賦
興來直上最高峰
日斜徙倚朱闌遍
縹緲孤雲是越中

卜大順一首

大順字信夫嘉靖癸丑進士
除知當塗縣入為刑部主事
改吏部歷稽勳司郎中有籃泉集

鄧尉探梅

日斜游倦宿湖干
一望苔枝湧翠巒
午夜月明涼似水
船頭獨坐不知寒

詩話三卜同懷取甲第仕俱不達而子姓至今猶保其故廬其後岳氏繼起雖疎無仕而後嗣周謝日甚矣謙大頗好事著述多有刊行者子

說錄三馮詩美以三卜先生作附於後

侯一元五首

一元字舜舉樂清人嘉靖戊戌進士累官河南布政使有二谷集

詩話二谷詩雖率易然有真趣

答鄭越山

故人情不怡
貽我書一尺
云從去年秋
及此春半夕
恒雨失時暘
有背不得炙
西山薇苦艱
東郭履無迹
徒吟無正詩
詎有救時策
君問調元人
尹去陟亦斥
負鼎元自肥
豈知天下瘠
冰山頃已頽
皎日方待赫
天子正更絃
羣公各虛席
谷口沉子真
東山卧安石
守道詎憂貧

明詩總卷四十五
弗損自成益世事如格五人生不盈百念我七十翁當
為幾時客

書扇贈王少華

古人有遺言惟白可受采齊紈變蟬雀昭質復安在願
持君子心如月初離海太空無纖翳溥白終不改四海
揚仁風蒼生良有待

看新曆有感

少日見星曆每自閱紀年常常在人後漸漸出其前壯
志輕遠道久為車牛牽曾未幾何時歲月忽我遷一朝
見新曆我辰不及編元雖貞下起所惜非故躔不知羲
和馭何日還來旋在天無停晷在地無停川吾生良已
矣來者其勉旃

舟次感懷

江城久客鬢垂絲故國長年入夢思老大總非童穉日
川原猶是釣游時笛中朋舊今誰在鏡裏衰顏轉自疑
安得相隨慶禽侶雲山采藥任吾之

甲戌七夕作是歲予有悼亡之感

靈匹經年悵已違佳期此夕儼相依悲歡轉首成陳迹
明日橋邊鵲又飛

侯一麀一首

一麀字舜昭一元弟有龍門集

競渡曲

遠水浮雲不見天
西橈處處旋龍船
誰家少婦輕回首
忘却臨流墮翠鈿

栗應麟 二首

應麟字仁甫長治人嘉靖己丑進士陳州知州
歷按察僉事有去陳集

雨夜泊舟天津荅劉笏山民部時駕幸承天

急雨危檣夜孤舟
溟海涯風濤驚宦轍
雲漢憶仙槎故國含情遠
殘燈照影斜
翠華在天末
遷客敢言家

興武營暮春感懷

邊雲漠漠點征衣
飲馬長城恨未歸
春色不堪愁裏盡
楊花又向客中飛

栗應宏 一首

應宏字道甫舉人有山居詩集

錢受之云道甫累試南宮不第耕讀太行山中

高子業解司封歸道甫擔簦相造雞黍定交子業作紫圍山人歌贈之云紫圍山高槩青雲栗家兄弟殊不羣陳州一出驅五馬令弟二十窺三墳陳州者道甫之兄仁甫也道甫山居詩六卷子業為之序

游城南池

偶下南山岑蕭然諧夙心
漳干一徑入煙景
四圍深秋水浸枯木夕陽明
遠林相期杳難即
漁浦晚沉沉

高岱 四首

岱字伯宗鍾祥人嘉靖庚戌進士除刑部主事
出為景府長史有居鄖西曹集

李伯承云伯宗擬古諸詩雖文通不能過

春甫云長史詩直與盛唐岑杜頡頏 冒伯慶云伯宗富才勁力與七子爭道而馳 錢受之云伯宗詩體與李伯承相似而時多矜厲之語

感興

二首

天員不中規地方不中矩人生天地間安得無齟齬仲尼屢放逐顏回苦貧窶賢哲不偶時古今那可數達士貴樂天仁人亦安土勉哉宣令德庶以表千古鴻鴈萬里來翩翩渡彭蠡海燕去何之秋風辭故壘去亦不足悲來亦不足喜物性各有適景光一何駛運至疇不興時過亦云止世事俱茫茫靜坐觀無始

登臺

薊北收兵未長安無使來風塵連朔漠雨雪暗蓬萊去鳥為誰急寒花何意開孤臣頭白盡倚杖獨登臺

寄懷李師孟水曹

別署秋光滿千帆霽色開海風吹月上江雨帶潮來名著山公啓詩傳水部才不知登眺處誰與共銜杯

高啓

一首

啓字叔崇嘉靖丙辰進士官兵部郎中有遺橐

山行

欲訪山中人未識山中路茅屋漏疎林蒼蒼但烟霧

何良俊

二首

良俊字元朗松江華亭人由歲貢生授南京翰

林院孔目有清森閣集

皇甫子循云吾鄉文徵仲以推擇待詔金門後十餘年而蔡九達繼

為南孔目又二十餘年而何君繼之杜甫草堂開於潭水羅舍精舍寄之江濱狎梵僧以幽探結勝流而觴詠每一篇出匪但藝苑翕推抑且問閭遞誦錢受之云元朗清詞麗句未逮文蔡然文以修謹自勵蔡以豁刻見譏而元朗風流豪爽為時人所歎羨二公殆不如也

詩話元朗早歲入南都隨顧東橋游燕多習舊聞東橋每宴集輒用教坊樂以箏瑟備觴當康陵南巡日樂工頓仁隨駕至北京得金元人雜劇元朗妙解音律令家中小鬟盡傳之置酒留宿恒自度曲有李節者善箏歌元朗品為教坊第一於時名彥咸賦詩留贈黃淳父詩所云十

春日寓懷

東方雖大隱終是漢庭臣如何敢恣肆嘲哂萬乘尊武帝本愛才寵賜亦殊倫百金買少婦終歲輒易人侍從匪孤遠諷說恒見親當時非不遇傲兀竟何因我今六尺軀頭白久沈淪始圖佐明時一官終為貧比肩侏儒笑爭食雞鶩嗔放身鹿豕場終勝金馬門若非速謝去孤意何由申

包大侍御冬日過余城館見貽新詩率爾奉酬

弱年慕大隱中歲棲附郭試以愜微尚兼用諧勝託環堵有舊營山楹無改鑿高樹列偃蹇羣峯羅峩峩輕颺披葯房微雨灑菌閣新竹漸紫苞繇花吐芳萼春歸競敷榮秋至同瓠落林卧閱代謝天游恣寥廓遺形偶斥鷃混迹隨屈蠖豈無寰市喧幸免纓組縛畢歲矢勿緩中懷諒無忤包子臺中彥風期眇丘壑暇日訪衡茅投我游園作委曲陶令言纏緜尚平約丈夫貴得意乘時展明略勉終天上期庶果林中諾

何良傳 二首

良傳字叔皮嘉靖辛丑進士官禮部郎中有禮

部集

許仲貽云叔皮詩舒徐暢達譬之洪流行地波瀾自生品亦在林采色各具徐伯臣云叔皮五言視漢人稍加藻績

贈徐伯臣補奉化令

嚴程忽云屈將子臨河橋弱柳向微風黃鳥時交交感物傷余心申爾以久要雖有盈尊酒何以永今朝徘徊意不極揮淚發長謠

董子元移居

南郭寡塵鞅東林有勝名青山斜枕市綠水曲依城夜月家家笛春風樹樹鶯結廬心自遠寧復世人情

金大車一首

大車字子有其先西域默伽國人明初歸義賜

姓居南京中嘉靖乙酉鄉試有方山遺豪

陳羽伯云子有

詩學襄陽隨州辭義兼美錢受之云子有從游於顧華玉賦詩搖筆立就嘗有不堪搖落逢秋日况復蹉跎入暮年之句陳羽伯怪其壯歲出語不祥死時年四十四羽伯與其弟子坤掇拾遺詩定次百篇

送汪汝玉守思南

謫宦君何恨高名世所傳殊方原鬼國瘴水積蠻烟十口天邊寄孤帆灘上懸中原萬餘里後會定何年

金大輿二首

大輿字子坤諸生有集

陳羽伯云子坤詩清新秀朗

中秋夜集

金素動四野佳氣集林塘中天圓景來冉冉揚清光芳池含微波流螢曜中堂良覲侈高會促席飛華觴絲竹

間哀響雲霞乍低昂人生宇宙中歡宴不可常名園秀
且麗秋夜清且長醉歌淹永夕清光未遽央

與文源朱二過溧陽道上

侵星發徂輶悠悠即長路家人前致詞問我將焉赴躬
耕苦旱乾何以資朝暮衣食事奔走晨寒犯霜露楓林
號夜烏宿草棲寒兔輕烟動墟里崩沙依淺渡悽悽浮
客心黯黯長天霧逍遙思孔桴獲落嗟莊瓠去去返蓬
蒿脫粟安吾素

文 彭一首

彭字壽承長洲人待詔徵明伯子由歲貢生仕
為國子監博士

題溪南別業

詩話二文翰墨無忝衡山詩雖流傳不多以比彭陸居周固當較勝

西溪溪水深不流溪南更築林堂幽會心自有濠濮想
乘興不數山陰舟一簾暮雨足吟眺萬疊春山作卧遊
主人縱有蒼生寄清夢依然狎白鷗

文 嘉四首

嘉字休承徵明次子由歲貢生官和州學正

天池

天池之山今始到仰首忽見蓮花峰池水潺湲瀉琴筑
石壁截葉開芙蓉春疇連延麥初熟暮嶺迴合烟已重
肩輿催予下山去悔不此地巢雲松

石湖

鷓鴣瀟瀟滿晴沙紅杏夭桃亂著花十里湖山開畫障
一雙小艇載琵琶

題畫

二首

清絕倪迂未易攀能將水墨繼荆關疎林斜日茅亭外
一片江南雨後山
沉香烟暖碧牕紗綠柳陰分夏日斜夢覺只聞鈴索響
不知山鳥啄枇杷

蘇

濂二首

濂字子川濮州人鴻臚署丞終府通判

青石嶺

鳥道盤雲細羊腸度坂危青迴峰歷亂丹轉磴逶迤飲
澗猿相掛懸厓樹倒垂平生愛山水此地足棲遲

絕句

新笋抽林與屋齊亂紅飛過画闌西流鶯定惜春將去
坐向綠陰深處啼

蘇

澹二首

澹字子冲舉人有蘇仲子集

鹽河聞鴈

客子起常早月明珠可親一聲沙際鴈匹馬渡頭人顧
侶鳴偏切悲秋興轉真蘭閨夢迴處應憶客邊身
暮秋夜宿紫荆關

驛路飄黃葉關門薄紫荊上都瞻處近北斗坐來平塞
冷秋笳斷原荒野燒明終軍雖老大還欲請長纓

蘇黃一首

黃號杏石官王府審理

寫蘭寄王湘雲

幽蘭兩三花寫在齊紈扇寄語女校書秋來心莫變

張鳳翼 五首

鳳翼字伯起長洲人嘉靖甲子舉人有處實堂

集

詩話伯起好填詞黎園子弟多演之然俗筆耳其弟叔貽詩亦庸庸惟幼于小有才然亦頹惰自放而吳人之謗比於四皇甫論其工拙判若雲泥矣

養蠶曲

曉露沾我襦採桑過南陌葉少不盈筐蠶饑妾行迫蠶
眠妾不眠絲成供夜織勞苦有如此方能成匹帛奈何
衣帛人翦裁不復惜

西苑志感

芙蓉別殿未央西爐氣晨飄雉尾齊出洛神龜將寶錄
銜花馴鹿遶金閨近臣拾翠供玄草使者乘驄訪碧雞
一自六龍天上去幾回清禁改璇題

蟬

抱葉微沾露臨風響過雲偶然鳴木末非欲使人聞

竹枝詞

妾從湘江歸君向湘江宿欲識淚痕多請看湘江竹

暮春感懷

野花開遍又殘春買權攜尊好及晨待得向平昏嫁畢
青山應笑白頭人

張獻翼

獻翼字幼于更名救國子監生有文起堂正續

集

魏仲嘉云幼于資鑿超敏標峰朗逸與兄伯起婉章新藻齊芬互
映劉子威云幼于詮詞清麗體舒興遠故能聲傾一時標映多

詩話幼于早擅才名見賞於文徵仲讀書上方山治平寺中撰周易約
說雜說臆說及讀易紀聞讀易韻致不失為儒生後乃狂易自肆與所
善張孝資儉點故籍刺取古人越禮任誕之事排目分類仿而行之兩
人為儔侶或歌或哭或紫衣徒使或白足行乞孝資生日自為尸幼于
率子弟總麻環哭上食設奠孝資坐而變之翼日行卒哭禮設妓樂哭
罷痛飲謂之收淚又有劉舍人與翼買歌者俄而病卒幼于持絮酒就

翼喪所哭之以詩復令會卿所狎胡姬為尸仍設雙俑夾侍作使伶人
奏琵琶再作長歌酌焉其放浪亦甚矣晚攜妓居荒圃中為盜所殺詩
乘輿會捷書
無暇持擇

七夕同趙今燕賦

翠帳紅妝送客亭佳人看黛遠山青試從天上看河漢
今夜應無織女星

張燕翼

一首

燕翼字叔貽嘉靖甲子舉人

送仲氏之南都

鷓原思別惜依依洛下憑誰薦陸機池上夢隨芳草去
江干心逐片帆飛愁添旅食頻彈鋏葉落空園靜掩扉
欲識倚門情更切白雲回首是庭幃

明詩綜卷四十五

